



MĀLŌ O SĀMOA

FA'AMATALAGA O FUAFUAGA MO TUPE A LE MĀLŌ

2025/2026

TALA O LE TUPE

FA'ASOLOGA O MATAUPU

1.	Fa'atomuaga	2
	Aiaiga mo le Saunia o Lipoti	2
2.	Sini Autū mo le Tamāo'āiga	3
	Faiga Fa'avae mo le Tala o le Tupe a le Mālō	3
3.	Iloiloga o le Tulaga i le Tamāo'āiga ma Tupe a le Mālō: TF2021/22-TF2024/25	4
	Tulaga i le Tamāo'āiga	4
	Tulaga Tau Tupe a le Mālō.....	6
	Faiga Fa'avae Tau Tupe	11
4.	Va'aiga Taula'i i le Tamāo'āiga ma Tulaga Tau Tupe.....	15
	Tulaga i le Tamāo'āiga	15
	Fa'amatalaga o Tupe a le Mālō mo Tausaga o Lumana'i.....	20
5.	Lu'itau i le Tala o le Tupe a le Mālō	32
	Lu'itau i le Tamāo'āiga	32
	Iloiloga i le Tala o le Tupe a le Mālō: Tulaga i Va'aiga Taula'i.....	33
	Lamatiaga i Suiga o le Tau ma Mala Fa'alēnatura	34
	Tulaga o Nonōgātupe	35
	O Isi Lamatiaga ua Alia'e Mai	35
6.	Polokalame tau Atiina'e a le Mālō	37
	Atiina'e Fa'aauau ma Atiina'e Fuafuaina a le Mālō.....	37

1. Fa'atomuaga

Aiaiga mo le Saunia o Lipoti

O lo'o fa'atūlāfonoina i le Tūlāfono mo le Pūleaina o Tupe a le Mālō 2001, ta'iala mo le pūlea lelei o tupe fa'aalu a le Mālō, fa'apea fo'i ma fa'amatalaga e mo'omia ona tu'uina i le folasaga o le tala fa'atatau o le tupe.

E tusa ai ma le Vaega 19 o le Tūlāfono, e tatau ona tu'uina atu i le Ofisa a le Fono Faitūlāfono le Fa'amatalaga o Fuafuaga mo Tupe, e fai ma vaega o fa'amaumauga o tala o le tupe.

O le Fa'amatalaga o Fuafuaga mo Tupe a le Mālō e iloilo ai le ō gatasi o le tala o le tupe ma le "Ta'iala mo le Lumana'i Manuia o Samoa" (TLMS); e fa'amatala ai mafua'aga o ni eseese i le tulaga o le tamāo'āiga ma tulaga tau tupe o le Mālō ma fuafuaga i totonu o le TLMS; o le va'aiga taula'i i le tamāo'āiga ma fa'amatalaga tau tupe o lo'o atagia ai fa'agasologa ina ia ausia taunu'uga o le TLMS; ma tulaga o lo'o fa'avae ai nei va'aiga taula'i. O nei taunu'uga lautele o le a ausia i se taumafaiga tu'ufa'atasi a le Mālō, vaega tuma'oti, nu'u ma alalafaga, fa'apea a tatou pa'aga mo atiina'e e ala i le fa'atinoina o polokalame tau atiina'e.

Ta'iala mo le Lumana'i Manuia o Samoa (TLMS)

O le sini autu o le Ta'iala mo le Lumana'i Manuia o Samoa lea e fa'atinoina mo le lima tausaga fa'aletupe (2021/22 - 2025/26), ia "Fa'aagava'aina Alalafaga, Fa'amausali le Lotoifale, ma Fa'ama'ite le Fa'atupula'ia o le Tamāo'āiga".

O lo'o tulimata'i Ta'iala Autū e lima e 'ausia ai le va'aiga taula'i o le "Tausia le nofo feālofani, le saogalēmū, ma le sa'olotoga mo tagata uma." E aofia ai:

1. Fa'aleleia le Atiina'ega o le Soifuaga Lautele
2. Fa'alauteleina o le Tamāo'āiga ma Gafataulimaina
3. Saogalēmū ma le Fa'atuatuaina o Pulega lelei
4. Si'osi'omaga Malupuipua ma Suiga o le Tau
5. Tulaga i Galuega a le Mālō ma Atiina'e Tetele

2. Sini Autū mo le Tamāo'āiga

Faiga Fa'avae mo le Tala o le Tupe a le Mālō

Na toe si'itia le tamāo'āiga o Samoa i tausaga fa'aletupe e fa'ua tuana'i, ona o le toe fa'aleleia o le vaega o tagata tafafao maimoa aemaise le si'itia pea o le fa'asiliga o tupe maua. Peita'i, o lo'o iai pea lu'itau e aofia ai a'afiaga o le tau ma le 'uti'uti o le tomai e fa'atinoina ai atiina'e tetele, e ono a'afia ai le fa'alaua'iteleina o le tamāo'āiga.

Sa lipotia i fa'amaumauga a le Fa'alapotopotoga o Fa'aputugatupe a le Lalolagi (IMF) ia Iulai 2025, le fa'aitiitia o le tulaga o tau o oloa ma auaunaga i tamāo'āiga a le lalolagi, e tusa lea ma le 3.6 pasene i le 2025 mai le 4.2 pasene i le 2024. O atunu'u o lo'o fotua'e mai i le maketi, o le a iai se fa'aitiitiga, ona o a'afiaga i le gaosia o oloa mo'omia fa'apea ma fete'ena'iga fa'avāomālō, e ono fa'afaigatā ai ona ausia le fua fa'atatau o tau o oloa ma auaunaga. O lo'o fuafua e toe fa'afo'i le fua fa'atatau o tau o oloa ma auaunaga i lona tulaga masani e 3.0 pasene i se taimi lata mai.

Sa si'itia le tamāo'āiga i le 4.2 pasene i le TF2024/25, mai le fa'atinoina o atiina'e tetele a le Mālō ma le vaega tumaoti mo tapenaga o le Fonotaga a Fa'auluulūga o Mālō o le Taupulega (CHOGM). Na fa'aauau pea lenei si'itaga ia Iuni 2025, ma ausia le si'itaga fa'a-le-kuata o le tamāo'āiga e 5.2 pasene. I le tali atu i le tulaga lelei sa iai tausaga fa'aletupe ua mavae, ua taula'i ai le va'ai a le Mālō e si'itia Tupe Fa'aalu, fa'amuumua le fa'alaua'iteleina o le tomai e gafatia ai le fa'atinoina o atiina'e tetele, aemaise lava i galuega e patino i Suiga o le Tau. O fa'ailoilo o lo'o fa'ata'atitia atu i lalo o le a tulimata'ia ai le fa'atinoga o le tala o le tupe, ma limata'ita'ina ai faiga fa'avae mo le pūlea lelei o tupe:

- i. Fa'asiliga o Tupe Fa'aalu i Tupe Maua ia i totonu o le 3.5% o le Tamāo'āiga;
- ii. Vaega o Tupe Maua i le Aofa'iga o Tupe Fa'aalu mo Galuega Fa'atino ia lē i lalo ifo o le 70%;
- iii. Totogi o Tagata Faigaluega¹ ia fa'atūmauina i totonu o le 35% o le Aofa'iga o Tupe Fa'aalu mo Galuega Fa'atino;
- iv. Aofa'iga o Tupe Fa'aalu mo Galuega Fa'atino ia fa'atūmauina i totonu o le 40% o le Tamāo'āiga;
- v. Tupe Totogi mo Nonogatupe ia i totonu o le 20% o Tupe Maua (e lē aofia ai Tupe Fa'ameaalofa); ma le
- vi. Aofa'iga o Nonogatupe a le Mālō ia i totonu o le 50% o le Tamāo'āiga.

¹ E na'o Matagaluega o le Mālō

3. Iloiloga o le Tulaga i le Tamāo'āiga ma Tupe a le Mālō: TF2021/22-TF2024/25

Tulaga i le Tamāo'āiga


O suiga lata mai i fuainumera fa'amauiina sa atagia ai le si'itia o le tamāo'āiga, e tusa ma le 2.3 pasene i le TF2021/22. O se pa'ū lea pe a fa'atusa i le 5.3 pasene sa fa'apea ona lipotia muamua, o lo'o atagia mai ai le vave ona toe fo'i le tamāo'āiga i lona tulaga masani ae le'i a'afia i le KOVITI-19. O lenei si'itaga ua fa'ailo mai ai le si'itia malosi o le tamāo'āiga i tausaga fa'aletupe e lua ua tuana'i, ma atagia ai foi le aogā tele o le aveese o tapula'a na fa'atulagaina e fa'aitiitia ai a'afiaga i vaega o le tamāo'āiga, e aofia ai le vaega o Faigafaiva, Isi Oloa Gaosi, Galuega Tetele, Fa'ato'aga, ma Fefa'ataua'iga. I le isi itū, o isi vaega o le tamāo'āiga na fa'amauiina le si'itia pea, e aofia ai Auaunaga Fa'apisinisi, Eletise ma le Suavai, fa'apea ma Fela'ua'iga mo le TF2021/22.

Ina ua toe tatala femālagā'iga fa'avāomālō ia Aokuso 2022, na maitauina ai le malosi o le fa'atupula'ia o le tamāo'āiga o Samoa e tusa lea ma le 15.2 pasene i le TF2022/23 – o se toe fetu'una'iga mai le

9.2 pasene sa fa'apea ona lipotia muamua. O lenei si'itaga maua luga o le tamāo'āiga na āfua mai i le fa'atupula'ia o le numera o tagata tafafao maimoa mai fafo, o le fa'atinoina o atiina'e tetele, o le fa'amanatuina o le 60 tausaga o le tutoatasi o le atunu'u, fa'apea fonotaga a ekalesia. O vaega o le tamāo'āiga na fa'amauiina ai le si'itia e aofia ai Faletalimālō ma Fale'aiga,

Auaunaga Fa'apisinisi, Fela'ua'iga, Faigafaiva, Auaunaga Ta'ito'atasi ma Isi, ina ua toe si'itia fefa'ataua'iga mai tagatānu'u ma tagata mai fafo.

Siata 3.1: Tulaga i le Tamāo'āiga



Fa'amatalaga: Ofisa o Fuainumera Fa'amauiina

Na amata ona telegese le si'itia o le tamāo'āiga i le TF2023/24, lea na fa'amauiina ai le si'itia i le 4.8 pasene. O lenei si'itaga na mafua mai i tapenaga mo le Fonotaga a Fa'auluulūga o Mālō o le Taupulega (CHOGM), le fa'aleleia o atiina'e tetele, o le Polokalame o Atiina'e mo Itūmālō (DDP), o tupe foa'i fa'ameaalofa mo ekalesia, aemaise o tauvaga i ta'aloga fa'aitulagi ma fa'avāomālō. Sa si'itia foi tupe fa'ameaalofa mo tausaga fa'amanatu a aoga, o le fa'amanatuina o aso fa'apitoa a le atunu'u, aemaise le Aso Tūto'atasi. O nei fa'amoemoega sa fai ma sao i le si'itia o le tamāo'āiga i vaega e aofia ai Faletalimālō ma Fale'aiga, Fela'ua'iga, Eletise ma le Suāvai, ma Faigafaiva.

I le TF2024/25, na si'itia ai le tamāo'āiga o Samoa i le 4.2 pasene, ma o lo'o fa'ailoa mai ai le fa'atuputupula'ia pea pe a fa'atusatusa i le tausaga fa'aletupe talu ai. O lenei si'itaga, e afua mai i le taligāmālō a le atunū'u i le Fonotaga a Fa'auluuluga o Mālō o le Taupulega (CHOGM), fa'atasi ai ma isi fa'amoemoega e pei o le fa'amanatuina fa'aletausaga o le Teuila, sa'iliga o se Tausala o Samoa, fonotaga a Ekalesia, ma fa'afiafiaga. E le gata i lea, a'o le fa'aleleia o atiina'e lautele ma faletalimālō, ua fa'atupula'ia ai isi vaega o pisinisi ese'ese, aemaise lava i vaega o Fefa'ataua'iga, Auaunaga Fa'apisinisi, Fela'ua'iga, Galuega Tetele, ma Auaunaga a le Mālō. E ui ina iai ni a'afiaga lē tumau o le motusia ai ma le tau fa'asoasoina o le eletise ia Fepuari 2025, na mafai lava ona fa'atūmauina le fa'atupula'ia o le tamāo'āiga ona o le si'itia o tupe fa'aalu i ni isi o vaega maoti, lea sa mafai ai ona tali atu i itu lē lelei o lea fa'alavelave fa'afuase'i.

Pusa 3.1: Fa'amaumauga o Fuainumera o le Tamāo'āiga TF2021/22 i le TF2024/25

	TF2021/22	TF2022/23	TF2023/24	TF2024/25
Tulaga i le Tamāo'āiga				
Tamāo'āiga (<i>miliona talā</i>)	2,317.66	2,853.12	3,240.39	3,584.94
Tamāo'āiga Fa'atulagaina (2013 tau fa'atulagaina) (<i>miliona talā</i>)	2,060.95	2,374.23	2,488.04	2,592.64
% Fa'atupula'ia	2.3	15.2	4.8	4.2
Paleni o le Tala o le Tupe				
Paleni o le Tala o le Tupe (<i>miliona talā</i>)	116.52	77.07	300.99	167.73
Tupe Maua				
Aofa'iga o Tupe Maua (<i>miliona talā</i>)	838.89	898.85	1,154.57	1,064.85
Tupe Maua i Lafoga (<i>miliona talā</i>)	555.54	673.93	784.87	835.55
Tupe Maua Fa'ameaalofa (<i>miliona talā</i>)	201.59	141.28	269.91	138.54
Isi Tupe Maua (<i>miliona talā</i>)	81.76	83.63	99.80	90.76
Tupe Maua (% o le Tamāo'āiga)	36.2	31.5	35.6	29.7
Tupe Maua i Lafoga (% o le Tamāo'āiga)	24.0	23.6	24.2	23.3
Tupe Maua i Meaalofa (% o le Tamāo'āiga)	8.7	5.0	8.3	3.9
Isi Tupe Maua (% o le Tamāo'āiga)	3.5	2.9	3.1	2.5
Aofa'iga o Tupe Fa'aalu				
Aofa'iga o Tupe Fa'aalu (<i>miliona talā</i>)	722.37	821.78	853.59	897.12
Tupe Fa'aalu mo Galuega Fai (<i>miliona talā</i>)	688.78	705.04	798.47	811.39
Fa'amaumauga o Fefa'ataua'iga o Aseta (<i>miliona talā</i>)	33.59	116.73	55.12	85.73
Aofa'iga o Tupe Fa'aalu (% o le Tamāo'āiga)	31.2	28.8	26.3	25.0
Tupe Fa'aalu mo Galuega Fai (% o le Tamāo'āiga)	29.7	24.7	24.6	22.6
Fa'amaumauga o Fefa'ataua'iga o Aseta (% o le Tamāo'āiga)	1.4	4.6	1.7	2.4
Feasoasoani a le Mālō (<i>miliona talā</i>)	8.38	2.40	5.75	6.45

	TF2021/22	TF2022/23	TF2023/24	TF2024/25
Feasoasoani a le Mālō (% o le Tamāo'āiga)	0.4	0.2	0.2	0.2
Nonōgātupe a le Mālō				
Nonōgātupe a le Mālō (<i>miliona talā</i>)	949.4	907.5	815.4	760.4
Nonōgātupe a le Mālō i le Tamāo'āiga (lalo ifo ma le 50%)	41.0	31.8	25.2	21.2
Aofa'iga Tupe Totogi mo Nonōgātupe (<i>miliona talā</i>)	66.2	95.8	99.4	94.7
Tupe Totogi mo Nonōgātupe i Tupe Maua e lē aofia ai tupe Fa'ameaalofa (lalo ifo o le 20%)	10.2	14.7	12.9	10.1

Fa'amatalaga: Matagaluega o Tupe, Faletupe Tutotonu o Samoa, ma le Ofisa o Fuainumera Fa'amauiina


Tulaga Tau Tupe a le Mālō

Paleni o Tupe Maua ma Tupe Fa'aalu o le Mālō

E pei ona fa'ailoa atu i le Siata 3.2, ua fa'amauiina le fa'asiliga o Tupe Maua a le Mālō mo Tausaga Fa'aletupe e tolu ua tuana'i, na mafua ona o vaega nei:

- O le fa'aauau pea o le si'itaga o fesoasoani tau tupe i le TF2021/22, fa'atasi ma le pa'ū i le aofa'iga o aseta tetele ona o le tuai o le fa'atinoina o ni isi o atiina'e tetele a le Mālō, lea sa ausia ai le fa'asiliga e 5.0 pasene.
- Na fa'amauiina se fa'asiliga o Tupe Maua e 2.7 pasene i le TF2022/23, ona o le fa'aauauina o le si'itia o tupe maua mai lafoga. Peita'i, ina ua toe tatalaina femalaga'iga fa'avāomālō, na toe fa'aauauina le fa'atinoina o atiina'e, lea na mafua ai le si'itia maua o le Aofa'iga o Aseta Tetele.
- I le TF2023/24, na si'itia le fa'asiliga o tupe maua i le 9.3 pasene ona o le si'itaga o fesoasoani tau tupe ma le fa'aauauina o le fa'aleleia o le aoina o tupe mai lafoga. I le isi itū, na fa'aititia le aofa'iga o aseta tetele pe a fa'atusatusa i le si'itaga lea sa fa'amauiina i le tausaga fa'aletupe talu ai.
- I le TF2024/25, e 4.7 pasene le fa'asiliga o tupe maua sa fa'amauiina e māfua mai le fa'atūmauiina pea o le si'itia o tupe maua mai lafoga e ui ina fa'aititia le tulaga o Tupe Maua Fa'ameaalofa. E fa'aopoopo iai i lea tulaga, le toe fa'aauauina o le

Siata 3.2: Paleni o Tupe Maua ma Tupe Fa'aalu fa'atusa i le Tamāo'āiga



Fa'amatalaga: Matagaluega o Tupe, Ofisa o Fuainumera Fa'amauiina

fa'atinoina lea o atiina'e tetele o le Mālō, ma ua fa'atumauiina ai le tulaga o le Aofa'iga o Aseta Tetele.

E tusa ai ma le Pusa 3.2 o lo'o i lalo, o lo'o fa'ailoa ai se fa'atusatusaga i le tulaga o Tupe Fa'aalu sa Fuafuaina aga'i i tupe ua Fa'amauiina na fa'aalu a le Mālō, i le fa'ausaga o lo'o iloiloaina. O a'afiaga o vavao o le KOVITI-19 i le fa'atinoina o galuega ma atiina'e a le Mālō ma vaega fa'amua a matagaluega, o lo'o atagia i le eseese i tupe fuafuaina ma tupe fa'amauiina o aseta tetele i le TF2021/22. Na toe fa'aauau le fa'atinoina o poloketi tau atiina'e i le TF2022/23, ae peita'i na toe pa'ū mauualo i le TF2023/24. I le TF2024/25, sa atagia ai le toe si'itia o le tulaga o Fa'amauiina o Fefa'ataua'iga o Aseta pe a fa'atua i le tausaga talu ai.


**Pusa 3.2: Fa'amatalaga o Tupe a le Mālō:
Gaoioiga e a'afia ai Meatōtino TF2021/22-TF2024/25**

	2021/22		2022/23		2023/24		2024/25	
	FUAFUAINA	FA'AMAUINA	FUAFUAINA	FA'AMAUINA	FUAFUAINA	FA'AMAUINA	FUAFUAINA	FA'AMAUINA
TUPE MAUA	850.8	838.9	754.8	898.9	843.5	1154.6	940.8	1064.7
<i>Lafoga</i>	483.6	555.5	516.7	673.9	555.2	784.9	616.2	835.6
<i>Tupe Fa'ameaalofa</i>	276.0	201.6	147.9	141.3	166.4	269.9	196.8	138.5
<i>Isi Tupe Maua</i>	91.3	81.8	90.3	83.6	121.9	99.8	127.7	90.8
TUPE ALU	732.1	688.8	728.0	705.0	779.3	798.5	826.8	811.4
PALENI O TUPE MAUA MA TUPE ALU	118.7	150.1	26.8	193.9	64.1	356.1	114.0	253.3
AOFA'IGA O MEATŌTINO E LĒ O NI TINOITUPE	158.0	33.6	100.6	116.7	154.1	55.1	174.7	85.7
AOFA'IGA MO'OMIA FA'AUNEGĀTUPE/NONŌGĀTUPE	-39.3	116.5	-73.8	77.1	-89.9	301.0	-60.7	167.7
AOTELEGA O MEATŌTINO MA NOATAGA	-39.3	116.5	-73.8	77.1	-89.9	301.0	-60.7	167.7
SUIGA TAU TUPE I MEATŌTINO	-113.6	60.9	-41.2	5.8	-189.2	216.0	-155.3	87.6
PALENI O LE FAASILIGA O TUPE NONŌ	-74.4	-55.6	-32.5	-71.3	-99.3	-85.0	-94.5	-80.1
FUA FA'ATATAU O LE TAMĀO'ĀIGA	2113.8	2317.7	2191.0	2853.1	2759.0	3240.4	2854.0	3584.9
<i>Fa'asiliga o Tupe Alu i Tupe Maua</i>	-1.9%	5.0%	-3.4%	2.7%	-3.3%	9.3%	-2.1%	4.7%

Tupe Maua

O le fa'atinoga o fuafuaga a le Mālō mo le toe fa'afo'isia o le tamāo'āiga ma le fa'amalosia o tulaga o alagātupe, na mafua ai le si'itia pea o le aofa'i o Tupe Maua. O lo'o manino i le Siata 3.3, le fa'atūmauina pea le tulaga o tupe maua i tausaga o lo'o iloiloaina, ma ua ausia ai se aofa'i e sili atu i le \$1 piliona talā mo Tupe Maua i le TF2023/24 ma le TF2024/25. O lenei tulaga e mafua mai i le fa'atupula'ia o tupe fa'ameaalofa ma lafoga, ona o le malosi o le tamāo'āiga ma le pulea lelei o tupe maua.

Siata 3.3: Tupe Maua



Fa'amatalaga: Matagaluega o Tupe ma le Ofisa o Fuainumera Fa'amauiina

O le fa'atūmauina pea o tupe fa'amomoli mai fafo ma le fesoasoani a le Mālō e ala lea i tupe tului atu i totonu o le tamāo'āiga i le vaitaimi o le fa'ama'i, na fa'apea ona fesoasoani i le fa'atupula'ia o tupe fa'aalu a tagatānu'u i manaoga lautele ae fa'apea tupe aoina mai lafoga mo le TF2021/22 ma le TF2022/23. O le fa'amalosia o fuafuaga mo le usita'ia o tulafono tau lafoga na fesoasoani lea i le si'itia o tupe aoina mai le TF2023/24 i le TF2024/25. E le gata i lea, sa una'ia tupe fa'aalu a tagatānu'u i mana'oga lautele e ala i le si'itia o le numera o tagata faimalaga mai fafo, atoa ai ma le fa'atinoina o le Polokalame mo Atiina'e o Itūmālō. Na toe si'itia tupe maua fa'ameaalofa e tusa lea ma le \$269.9 miliona tala i le TF2023/24, mai le pa'ū sa fa'amauiina i le TF2022/23 ona o le toe fa'avasegaina o fesoasoani tu'u sa'o mo le tala o le tupe, ina ia atagia ai lona fa'atupega o le fa'asiliga o tupe alu i tupe maua. Sa fa'atūmauina pea le si'itia o tupe maua mai lafoga mo le TF2024/25, e āfua mai i le fa'aauauina pea o le usita'ia o tulafono tau lafoga fa'apea le si'itia o tupe fa'aalu a āiga ma pisinisi. I le isi itū, sa fa'aitiitia le Aofa'iga o Tupe Maua i le tu'uitiitia o tupe fa'ameaalofa i lea tausaga fa'aletupe.

Pusa 3.3 Tupe Maua a le Mālō o Samoa i Itūaiga TF2021/22-TF2024/25

	2021/22		2022/23		2023/24		2024/25	
	FUAFUAINA	FA'AMAUINA	FUAFUAINA	FA'AMAUINA	FUAFUAINA	FA'AMAUINA	FUAFUAINA	FA'AMAUINA
TUPE MAUA	850.8	838.9	754.8	898.8	843.5	1154.6	940.8	1064.9
Lafoga	483.6	555.5	516.7	673.9	555.2	784.9	616.2	835.5
Lafoga o Totogi, Tupe Fa'asili, ma tupe fa'asili o aseta	126.7	136.1	120.6	140.1	129.3	182.9	139.7	213.4
Lafoga o Aseta Tumau	0.8	0	0.8	0.0	0.8	0.0	0.8	0.0
Lafoga o o Oloa ma Auaunaga	304.3	352.5	328.5	450.0	348.3	515.1	392.6	533.9

	2021/22		2022/23		2023/24		2024/25	
	FUAFUAINA	FA'AMAUINA	FUAFUAINA	FA'AMAUINA	FUAFUAINA	FA'AMAUINA	FUAFUAINA	FA'AMAUINA
VAGST	167.1	221.5	180.6	281.5	175.5	316.6	209.7	322.7
Tiute Fa'aopoopo	126.7	124.6	137.5	158.6	162.3	179.4	167.2	190.7
Lafoga mo auaunaga fa'apitoa	9.9	6.4	9.9	9.9	10.0	19.1	15	20.5
Lafoga o le fa'aaogaina o oloa, pemita mo le fa'aaogaina	0.5	0.0	0.54	0.0	0.54	0.0	0.56	0.0
Lafoga o Fefa'ataua'iga ma Atunu'u i Fafo	51.7	66.9	66.7	83.9	76.7	86.9	83.1	88.2
Tupe Fa'ameaalofa	276.0	201.6	147.9	141.3	166.4	269.9	196.8	138.5
Isi Tupe Maua	91.3	81.8	90.3	83.6	121.9	99.8	127.7	90.8
Tupe Maua mai le galueina o Aseta a le Mālō	12.3	29.9	28.5	16.3	41.1	36.7	49	22.4
Fa'atauina o oloa ma auaunaga	51.8	51.3	37.2	66.7	48.8	62.5	46.6	66.1
Fa'asalaga	27.1	0.6	24.6	0.6	32.0	0.6	32.1	2.3
Tupe maua lautele ma isi	0	0.0	0	0.0	0	0.0	0	0.0


Tupe Fa'aalu

E pei ona fa'amauiina i le Siata 3.4, sa toe si'itia le aofa'iga o Tupe Fa'aalu i le TF2022/23 mai le TF2021/22, ona o le fa'amauamua a le Mālō i le fa'atinoina lelei o fuafuaga o le tala o le tupe ina ua toe tatala faigāmalaga fa'avāomālō. O le maua o

le si'itia o le tamāo'āiga i lea vaitaimi, na fesoasoani tele i le fa'apaleniina o tupe fa'aalu i le tamāo'āiga (Pusa 3.1), e ui i le lelei o le fa'atinoina o fuafuaga tetele a le Mālō e aofia ai le Polokalame mo Atiina'e o Itūmālō, fa'amanatuina o le 60 tausaga o le tuto'atasi o Samoa, le 50 tausaga o le NPF, fa'apea le fesoasoani na tu'uina atu mo pisinisi ma fa'alapotopotoga tumaoti.

Sa fa'amauiina le maua o le Aofa'iga o Aseta Tetele i le TF2021/22 ona o a'afiaga i le fa'amalosia o aiaiga o le Poloa'iga o Fa'alavelave Fa'afuasei a le KOVITI-19, lea sa a'afia ai le fa'amatu'uina atu o tupe mo le fa'atinoina o poloketi tetele. Peita'i, ina ua

Siata 3.4: Tupe Fa'aalu



Fa'amatalaga: Matagaluega o Tupe, Ofisa o Fuainumera Fa'amauiina

toe tatala femālaga'iga fa'avāomālō i le TF2022/23, sa si'itia ai le Aofa'iga o Aseta Tetele ona ua mafai ona toe fa'aauauina le fa'atinoga o atiina'e. I le TF2023/24, sa si'itia le aofa'iga o tupe fa'aalu e mafua mai i galuega fa'atino, peita'i sa maitauina le pa'ū mauualalo o Fa'amaumauga o Fefa'ataua'iga o Aseta, lea na toe fa'aitiitia ai tupe fa'aalu, ona o le tuai o le fa'atinoina o atiina'e tetele a le Mālō. Sa fa'atūmauina pea le si'itia o le aofa'iga o tupe fa'aalu mo le TF2024/25 ona o le fa'aauauina o galuega fa'atino. Fa'atasi ai i lea tulaga, sa maitauina le si'itia o Fa'amaumauga o Fefa'ataua'iga o Aseta, ua atagia ai le toe fa'aauauina o le fa'atinoina o atiina'e tetele a le Mālō. O lea tulaga, ua mata'itūina ai le lelei o tupe fa'aalu a le Mālō mo le fa'atūmauina o auauunaga mo'omia fa'atasi ai ma le fa'asologa o atiina'e tetele e lagolagoina ai le si'itia pea o le tamāo'āiga.

Pusa 3.4: Tupe Fa'aalu a le Mālō o Samoa i Itūaiga TF2021/22-TF2024/25

	2021/22		2022/23		2023/24		2024/25	
	FUAFUAINA	FA'AMAUIA	FUAFUAINA	FA'AMAUIA	FUAFUAINA	FA'AMAUIA	FUAFUAINA	FA'AMAUIA
TUPE ALU	732.1	688.8	727.9	705.0	779.3	798.5	826.8	811.4
Fa'amanuiaga ma totogi o tagata faigaluega	302.5	281.5	307.1	278.8	370.6	295.9	392.1	315.1
Fa'aogaina o oloa ma auauunaga	199.4	172.5	154.4	187.9	302.6	255.1	329	217.2
Tului	11.2	10.6	14.0	12.7	12.6	14.4	11.6	12.8
Tupe faamatuu Atu	26.7	8.4	20.8	2.4	24.2	5.8	25.3	6.5
Fa'ameaalofa	127.0	173.1	174.6	178.2	14.6	185.5	11.7	214.7
Tupe Fa'ameaalofa	52.7	34.4	43.9	35.6	41.2	34.7	44.1	35.7
Fa'amanuiaga mo le Soifua Manuia	12.6	8.4	13.1	9.4	13.5	7.2	13	9.4
Isi Tupe Alu								
AOFA'IGA O MEATŌTINO E LĒ O NI TINOTUPE	158.0	33.6	100.6	116.7	154.1	55.1	174.7	85.7

O le aofa'iga o tupe fa'aalu a le Mālō o lo'o atagia mai ai le fa'atupulā'ia pea o tupe fa'ameaalofa i Fa'alapotopotoga a le Mālō, le Polokalame mo Atiina'e o Itūmālō, ma Tupe Fa'ameaalofa atu i aoga o le atunu'u i tausaga e fa ua tuana'i.

Nonōgātupe a le Mālō

Sa fa'amauiina i tausaga ua iloiloina le fa'aleleia pea o le tulaga o nonōgātupe a Samoa. O le aofa'iga o nonōgātupe pe a fa'atusa i le tamāo'āiga sa fa'atūmauina i le lē sili atu ma le tapulā'a e 50 pasene, lea sa fa'aitiitia mai le 41.0 pasene i le TF2021/22 i le 21.2 pasene i le TF2024/25. O lea fa'aitiitiga, o lo'o atagia ai le si'itia o le tamāo'āiga fa'apea le fa'aitiitia o le aofa'iga o nonōgātupe, lea sa pa'ū mai le \$949.4 miliona talā i le \$760.4 miliona talā. O le pasene o tupe fa'aagaga mo le totogiina o nonōgātupe i le aofa'iga o tupe maua sa fa'amauiina i le fa tausaga talu ai, o lo'o fa'atūmauina pea le lē sili atu ma le tapulā'a o le 20 pasene.

E ono nonōgātupe a le Mālō na mae'a le totogiina ma tapunia i le fa tausaga ua mavae. E aofia ai le nonōgātupe mai le Faletupe o Atiina'e o Asia (ADB) mo le Poloketi lona Fa a le Faletupe mo Atiina'e o Samoa (DBS), lea na mae'a na totogi i le TF2021/22. O le

isi nonōgātupe mai le Faletupe o Atiina'e o Asia mo le Poloketi a le Fa'alapotopotoga o Esetete Tausi a Samoa i Sisifo (WSTEC), na mae'a le totogiina i le TF2022/23. I le TF2023/24, na fa'amae'aina ai le nonōgātupe a le Fa'alapotopotoga o Esetete Tausi a Samoa (STEC) mai le Fa'alapotopotoga o Fa'aputugātupe Teufa'afaigaluega o Mavaega Tausi a Samoa (UTOS). I le TF2024/25, e tolu isi nonōgātupe na fa'amae'a le totogiina ma tapunia ai: o le nonōgātupe mai le Faletupe o Atiina'e o Asia, o le tasi mai le Faletupe o le Lalolagi (IDA-World Bank), ma le isi mai le Fa'aunegātupe mai le Fa'aputugātupe a le Fa'alapotopotoga a Atunu'u e Auina Atu i Fafo Suāu'u (OPEC).

O le puleaina lelei o nonōgātupe a le Mālō, e aofia ai le mata'itūina o nonōgātupe lē fuafuaina, lea e iai nonōgātupe e fa'amaonia e le Mālō, nonōgātupe a Fa'alapotopotoga a le Mālō, ma nonōgātupe a le Mālō e toe nonō atu i Fa'alapotopotoga. O le aofa'iga atoa o nei nonōgātupe e tusa lea ma \$274.6 miliona talā i le fa'ai'uga o le TF2024/25. O lo'o iai i le aofa'iga nonōgātupe e fa'amaonia e le Mālō e tusa lea ma le \$93.2 miliona talā, po'o le 2.8 pasene o le tamāo'āiga, ma o lo'o i totonu o le tapula'a o le 10 pasene. O le tele o nei nonōgātupe na umia e le Faletupe mo Atiina'e o Samoa, ma isi vaega na umia e le Pulega o Malaeva'alele (SAA), le Fa'alapotopotoga o Fale o Samoa (SHC), le Kamupani o Auaunaga mo Mataupu tau Va'a (SSS), ma le Kamupani Va'alele o le Polenisia - Samoa Airways (PAL-SAL). O le aofa'i o nonōgātupe a Fa'alapotopotoga a le Mālō e lē o iai se fa'amalumaluga a le Mālō e tusa lea ma le \$30.2 miliona talā, e aofia ai nonōgātupe a le Fa'alapotopotoga o Fale o Samoa (SHC) ma le Fa'alapotopotoga o Fanua o Samoa (SLC). O le paleni totoe o nonōgātupe a le Mālō e toe nonō atu i fa'alapotopotoga e tusa lea ma le \$151.3 miliona talā. O se vaega tele o lenei aofa'i e mo le Fa'alapotopotoga o Mālosi'aga tau Eletise (EPC) ma le Samoa Submarine Cable Company (SSCC), atoa ai ma ni isi o vaega mo le Fa'alapotopotoga o Fa'aputugātupe Teufa'afaigaluega o Mavaega Tausi a Samoa, ma le Faletupe mo Atiina'e o Samoa. O lo'o fa'aauauina le mata'itūina o nei nonōgātupe auā le fa'afoeina lelei o ni a'afiaga i le tala o le tupe, e ono tula'i mai i ni suiga i tulaga tau tupe a nei fa'alapotopotoga.

Faiga Fa'avae Tau Tupe

Sa maualuga le tulaga sa iai le tau o le soifuaga i le lalolagi ma Samoa nei i le fa tausaga ua mavae, ae na maitauina le toe fo'i i lona tulaga masani i le TF2024/25. O le tau o oloa sa fa'apea ona pa'ū maualalo, e mafua ona o le pa'ū o tau o oloa i le lalolagi ma le fa'aitiitia o le mana'oga i totonu o le atunu'u, pe a fa'atusatusa i le si'itia o gaoioiga tau tamāo'āiga ina ua toe tatala ālāva'a ia Aokuso 2022. Ona o le tulaga lelei o lo'o iai le tau o auaunaga ma le va'aiga taula'i o le tamāo'āiga, lea ua fa'atūmauina ai pea le Faiga Fa'avae Tau Tupe a le Faletupe Tutotonu o Samoa, ma le naunauta'iga e tu'uitiitia le maualuga o lo'o iai le tulaga o mea tau tupe (liquidity), ae fa'apea taumafaiga e fa'atūmauina ai tului o tupe i le tapula'a e tusa lea ma le 2-3 pasene. O lea galuega e aofia ai le fa'asoasoina lelei o Pepa o Tupe Teu Fa'avaitaimi a le Faletupe Tutotonu o Samoa ae fa'apea le fa'aauau pea o le galulue fa'atasi ma Fa'alapotopotoga

Tautupe. O nei taumafaiga uma e lē o’o ai se tulaga e taofiofi ai Faiga Faavae Tau Tupe, ae ia iai se avanoa e mafai ai ona toe sui Faiga Fa’avae Tau Tupe a le Faletupe Tutotonu o Samoa.

Tau o Oloa ma Auaunaga


O le tau o oloa ma auaunaga i le TF2021/22 sa fa’amauina i le 8.8 pasene, ma o se si’itaga maualuga mai le tausaga fa’aletupe talu ai. O lea si’itaga maoa’e sa mafua ona o vavao o le KOVITI-19, e aofia ai fo’i a’afiaga o le amatalia lea o le taua i le vā o Lusua ma Ukraine, lea sa si’itia maualuga ai le tau o mea taumafa fa’apea le tau o le suau’u.

Sa fa’amauina le si’itia pea o le tau o oloa ma auaunaga i le TF2022/23, e tusa lea ma le 12.0 pasene, ma atagia ai le fa’aauau pea o a’afiaga i le gaosia o oloa mo’omia ma le fa’atupula’ia o mana’oga i totonu o le atunu’u, ona o le vaitaimi sa toe tatalaina ai femālaga’iga fa’avāomālō ia Aokuso 2022, lea sa to’atele ai tagata asiasi mai, fa’apea le toe fa’aauauina o galuega mo le tamāo’āiga.

Ae peitai, i le TF2023/24, sa fa’apea ona pa’ū maualalo le tau o oloa ma auaunaga i le 3.6 pasene, ona o le ō gatasi uma o le pa’ū o le tau o oloa i le lalolagi, fa’aitiitia o oloa maua, aemaise le ‘uti’uti o oloa, fa’apea mana’oga i totonu o le atunu’u. Sa va’aia fo’i le pa’ū o le tau o Fale, Suavai, Eletise, Kesi ma isi Suāu’u, Fela’ua’iga, fa’apea A’oa’oga.

Na fa’atūmauina pea le pa’ū maualalo o tau o oloa ma auaunaga i le 1.8 pasene i le TF2024/25, ma o lo’o i lalo ifo o le tapula’a mo le tau o le soifuaga. O lenei tulaga e āfua mai i le tu’uitiitia o tau o oloa mai fafo e pei o le suāu’u, kesi, pasese o va’alele fa’atasi ai ma le tau o fela’ua’iga ma meāfale. Ae peita’i, sa si’itia tau o mea’ai e gaosia i totonu o le atunu’u e pei o talo, i’a, ma popo, atoa ai ma tau o feso’ota’iga ma auaunaga mo aiga, lea na tau fa’aiti’itia mai ai nei a’afiaga.


Siata 3.5: Tau o Oloa ma Auaunaga



***Fa’amatalaga:** Faletupe Tutotonu o Samoa ma le Ofisa o Fuainumera Fa’amauina*

Aofa'iga o Tagata Tafafao Maimoa Mai ma Tupe Maua

Siata 3.6: Aofa'iga o Tagata Tafafao Maimoa Mai ma Tupe Maua



Fa'amatalaga: Faletupe Tutotonu o Samoa

I le TF2021/22, i le vaitaimi o le KOVITI-19 a o tapunia femāлага'iga fa'avāomālō, sa maitauina ai le leai o ni tagata tafafao maimoa mai fafo ma ni tupe maua mai ai, ona o le taofia lea o femāлага'iga i lalo o le Poloa'iga mo Fa'alavelave Fa'afuase'i ia Mati 2020.

I le TF2022/23, na si'itia maualuga le numera o tagata tafafao maimoa mai fafo i le tusa lea ma le 145,763, ma tupe maua e \$424.5 miliona talā. O lea si'itaga na mafua i le toe tatalaina o femāлага'iga fa'avāomālō ia Aokuso 2022, ma maitauina ai fo'i i lenā vaitaimi le to'atele o aiga ma uō sa fa'apea ona asiasi mai.

I le TF2023/24, na faapea ona toe si'itia atili le aofa'iga o tagata asiasi mai e tusa lea ma le 178,190 ma tupe maua e \$618.9 miliona talā. Na sili atu le fuainumera o tagata sa faimalaga mai mo mālōlōga nai lo'o aiga ma uo asiasi mai, i le ulua'i tausaga talu ona toe tatalaina femāлага'iga fa'avāomālō. O lo'o atagia mai ai ni a'afiaga lelei mai i fa'afiafiaga fa'aleaganu'u, ta'aloga, ma isi o fa'amoemoega sa una'ia ai le tosina mai o tagata tafafao maimoa.

I le TF2024/25, na toe si'itia atili ai le aofa'i o tagata asiasi mai i le 189,937, ma atagia ai le sili atu i lo'o le tulaga masani sa iai a'o lei a'afia i le fa'ama'i o le KOVITI-19, ma si'itia ai tupe maua mai tagata tafafao maimoa i le \$678.1 miliona talā. O lenei si'itaga na mafua i ni isi o fa'amoemoe tau fa'aleāganu'u ma tagata tafafao maimoa, e aofia ai le fa'amanatuina o le Teuila, o le Tauvaga Tausala o Samoa, fa'apea koneseti. E le gata i lea, o le taligāmālō mo le Fonotaga a Fa'auluuluga o Mālō a le Taupulega ma ona tapenaga, fa'apea fonotaga fa'aitūlagi sa fesoasoani tele i lenei si'itaga. O nei fa'amoemoega e tutupu fa'avaitaimi atoa ai ma tagata tafafao faimalaga mai, o lo'o fai pea ma sao tāua i le ūna'ia lea o le numera o tagata asiasi mai, ma o lo'o maitauina le maualuga o tagata maimoa e omai e tafafao pe a fa'atusa i uō ma 'āiga e pei ona masani ai.

Tupe Fa'amomoli Mai Fafo

O lo'o maitauina pea le si'itia o tupe fa'amomoli mai fafo i le fa tausaga fa'aletupe ua mavae. O Niu Sila o lo'o maua lona sao, soso'o ai ma Ausetalia. O a'afiaga o le KOVITI-19 fa'apea le si'itia o tagata faigaluega fa'avaitaimi i atunu'u i fafo, sa fai ma sao tele i le si'itaga o tupe fa'amomoli mai fafo i le TF2021/22 ma le TF2022/23.

O tausaga fa'aletupe e lua


talua ai, sa maitauina le telegese o le si'itaga o tupe fa'amomoli mai fafo ina ua mae'a le fa'ama'i o le KOVITI, atoa ai ma le fa'aitiitia mālīe o tagata faigaluega fa'avaitaimi, fa'atasi ai ma le fa'aitiitia o tupe fa'amomoli mai atunu'u mamao masani. Ae ui i lea, sa maitauina pea le si'itia o le aofa'iga atoa o tupe fa'amomoli mai atunu'u mamao. I le TF2024/25, sa va'aia le pa'ū o tupe fa'amomoli mai Niu Sila, Amerika Samoa, ma isi atunu'u, e tusa lea ma le \$25.77 miliona talā i lona aotelega. Peita'i, sa fa'apea ona fa'apaleni i le maua lona o tupe fa'amomoli mai Ausetalia ma Amerika, lea na si'itia i le \$53.36 miliona talā, ma taunu'u ai i lona si'itaga atoa e \$25.77 miliona talā.

I lona aotelega, na si'itia le aofa'iga o tupe fa'amomoli mai fafo mai le \$732.21 miliona talā i le TF2021/22, i le \$902.73 miliona talā i le TF2024/25.

Tupe Fa'aagaaga i Atunu'u i Fafo

I le masina o Me 2023, sa fa'apea ona ausia le aofa'iga o tupe fa'aagaaga i atunu'u i fafo, i le tusa lea ma le \$1.01 piliona talā. O lo'o tumau pea le si'itia o tupe fa'aagaaga mo tausaga o lo'o iloiloina, mai le \$812.7 miliona talā (tusa lea ma le 10.9 masina o oloa fa'atauina mai fafo) i le TF2021/22, i le \$1.6 piliona talā (e tusa ma le 15.2 masina o oloa fa'atauina mai fafo) i le TF2024/25. Ua maitauina ai le fa'aauau pea ona ausia e Samoa o le fua fa'atatau o masina o oloa auina mai fafo. O le fa'atumauina pea o le si'itia o tupe fa'aagaaga, o lo'o atagia ai le malosi o fesoasoani tau tupe tu'usa'o mai a tatou pa'aga mo atiina'e aua le tali atu i a'afiaga o le KOVITI-19, aemaise o le fa'aauauina o fesoasoani tau tupe e masani ona tu'uina mai mo le tala o le tupe, lea o lo'o atagia ai le fa'atinoina ma le ausia o fa'ailoilo ma faiga fa'avae i lalo o le Auivi o Faiga Fa'avae Tu'u fa'atasi (JPAM).

Siata 3.7: Aofa'iga o Tupe Fa'amomoli Mai Fafo



Fa'amatalaga: Faletupe Tutotonu o Samoa

4. Va'aiga Taula'i i le Tamāo'āiga ma Tulaga Tau Tupe

Tulaga i le Tamāo'āiga

Va'aiga Taula'i i le Tamāo'āiga o le Lalolagi

Sa lipotia i fa'amaumauga a le Fa'alapotopotoga o Fa'aputugātupe a le Lalolagi (IMF), mo le masina o Iulai 2025, le ono si'itia o le tamāo'āiga o le lalolagi i le 3.0 pasene i le 2025 ma le 3.1 pasene i le 2026, o se tu'uitiitiga mai i le va'aiga taula'i muamua sa fa'apea ona lipotia i le masina o Aperila 2025. O lenei iloiloga lata mai o lo'o atagia ai le tu'uitiitia o lafoga mo fefa'ataua'iga, le tulaga malosia o fefa'ataua'iga i le amataga o le 2025, fa'aleleia o tulaga tau tupe, ma le si'itia o tupe fa'aalu o Mālō i atunu'u tetele. O nei ālāfua ua a'afia ai fefa'ataua'iga ma atunu'u i fafo, fa'atupula'ia ai le lē mautonu, ma suia ai gaioiga tau tamāo'āiga. Mo le lima tausaga o i luma, o lo'o fuafuaina le fa'atupula'ia o le tamāo'āiga o le lalolagi i le 3.0 pasene, e i lalo ifo ma le tulaga masani o le 3.7 pasene mai tausaga 2000–2019.

E eseese a'afiaga i atunu'u ta'itasi o lafoga mo fefa'ataua'iga, e fua lea i vaega e pei o pa'aga mo fefa'ataua'iga, vaevaeina o ituaiga pisinisi, faiga fa'avae a Mālō, ma le tomai e mafai ai ona fa'alateleina oloa e fefa'ataua'i ma atunu'u i fafo. I isi itulagi, aemaise i Saina ma Europa, o fesoasoani mo faiga fa'avae mo tupe a Mālō sa fesoasoani tele i le fa'aitiitia o a'afiaga ona o nei suiga fou i ālāfua mo fefa'ataua'iga. Ua atagia ai le tāua tele o faiga fa'avae o tupe a Mālō, e māmā ai a'afiaga o lafoga mo fefa'ataua'iga i le tamāo'āiga, o le sao tāua lea o faiga fa'avae tau tupe i taimi o le lē mautonu o le tamāo'āiga. Ae peita'i, o le va'aiga taula'i o lo'o fa'aalia ai ni lu'itau tumau i le tamāo'āiga, e aofia ai tulaga tau tupe, o fete'ena'iga i fefa'ataua'iga fa'avāomālō, o le lē mautonu o faiga fa'avae, ma a'afiaga i le ono si'itia o tau o oloa. E 4.2 pasene le va'aiga taula'i a le IMF i le tulaga o le tau o le soifuaga i le lalolagi mo le tausaga 2025, ma le 3.6 pasene i le 2026 e ō gatasi lea ma le fa'atupula'ia o tamāo'āiga i atunu'u eseese o le lalolagi.

Va'aiga Taula'i: Tamāo'āiga a Atunu'u Fa'apa'aga Masani a Samoa

O le va'aiga taula'i mo tamāo'āiga o atunu'u fa'apa'aga masani a Samoa, e pei o Niu Sila ma Ausetalia, o le a telegese le fa'atupula'ia. E tusa ai ma le Lipoti o Fa'amatalaga o Fuafuaga mo Tupe a le Mālō a Niu Sila ia Me 2025, o le a si'itia le fa'atupula'ia o le tamāo'āiga mai le 1.5 pasene i le TF2024/2025 ma fa'aauau atu i le 2.1 pasene i le TF2025/2026, ona o le fa'aiti'itia o le si'itia o tau o oloa ma auaunaga, ma le tu'uitiitia o tului (interest rates) ina ia fesoasoani ai i tupe fa'aalu a 'āiga (household consumption), ma toe fa'aleleia ai tupe teufa'afaigaluega a i latou e 'umia fale. O se va'aiga i le tamāo'āiga o Ausetalia, e tusa ma le 1.5 pasene o lo'o fuafua e si'itia ai i le TF2024/25, ma toe si'itia atili i le 2.3 pasene i le TF2025/26, ona o le toe si'itia o tupe fa'aalu a aiga ma le fa'atupula'ia o tupe teufa'afaigaluega e tusa ai ma le latou Lipoti o Fuafuaga mo Tupe 2025-2026.

Va'aiga Taula'i: Tamāo'āiga o Atunu'u o le Pasefika

O le Lipoti a le Faletupe o le Lalolagi i tamāo'āiga a le Pasefika (Pacific Economic Update) ia Iuni 2025, na fa'aailoa ai le fa'aitiitia o le fa'atupula'ia o tamāo'āiga mo atunu'u e 11 o le Pasefika (Atu Maikoronisia, Fiti, Kilipati, Atu Malesala, Nauru, Palau, Samoa, Atu Solomona, Toga, Tuvalu, ma Vanuatu). I le tausaga 2024, na fa'aitiitia ai le fa'atupula'ia o le tamāo'āiga i le 3.8 pasene ina ua mae'a le si'itaga maualuga i le 2023 e 5.5 pasene. E fa'amoemoe fo'i o le va'aiga taula'i mo le fa'atupula'ia o le tamāo'āiga o le a fa'aitiitia atili e tusa lea ma le 2.6 pasene i le 2025. O lenei tu'uitiitiga o lo'o atagia ai le toe fo'i o le tamāo'āiga a Fiti i lona tulaga masani mai le tulaga maualuga sa iai ina ua mae'a le fa'ama'i o le KOVITI. E aofia ai fo'i lu'itau ma suiga fa'alotoifale i Solomona, ma le tulaga ma'ale'ale i a'afiaga mai fafo. O lo'o fuafuaina foi le fa'aitiitia o le fa'atupula'ia o le tamāo'āiga i Vanuatu, ona o fa'alavelave e lua mai le motusia o auaunaga i femālagā'iga o va'alele ma se mafui'e mātuiā. E ui i lea, o lo'o fuafuaina le si'itia o tamāo'āiga mo atunu'u e fa'alagolago i tagata tafafao maimoa ma tupe fa'amomoli mai fafo, e pei o Samoa i le 5.3 pasene ma Palau i le 8.8 pasene i le 2025. O lo'o fuafua e tusa ma le 2 pasene le fa'atupula'ia o le tamāo'āiga o atunu'u o le Pasefika i tausaga o lumana'i, e maualalo atu nai lo'o le sefulu tausaga ua tuana'i a'o le'i o'o mai le fa'ama'i. E mafua lea ona o tulaga lē mautonu i le tamāo'āiga o le lalolagi, a'afiaga o suiga o le tau, ma lu'itau fa'alotoifale ma tulaga tau faiga fa'avae o lo'o a'afia ai atunu'u o le Pasefika.

Tau o Oloa ma Auaunaga

O le tau o oloa ma auaunaga o lo'o fa'atūmauina pea i se tulaga maualalo ma mautū, o lo'o i lalo ifo ma le tapula'a o le 3.0 pasene. O le tau o oloa fa'aletausaga ua fa'amauina i le 2.7 pasene i le fa'ai'uga o Aokuso 2025. Peita'i, o le tau o oloa ma auaunaga ua aveeseina ai oloa ma'ale'ale (underlying inflation), ua si'itia i le 6.2 pasene i le masina lava e tasi. I le va'aiga aga'i i le lumana'i, o lo'o fuafuaina le si'itia o le tau o oloa ma auaunaga i le 2.9 pasene i le fa'ai'uga o Iuni 2026. O lea ua fuafuaina e fa'asolo ina si'itia mālīe le tau o oloa auina mai fafo i le 0.8 pasene fa'apea ma le tau o oloa i le lotoifale i le 4.6 pasene, i le fa'ai'uga o Iuni 2026.

Tupe Fa'aagaga i Atunu'u i Fafo

O lo'o fa'atūmauina le maualuga o le aofa'iga o tupe fa'aagaga i atunu'u i fafo mo fefa'ataua'iga, e tusa lea ma le \$1,594.75 miliona talā i le fa'ai'uga o Iulai 2025, e tusa lea ma le 15.8 masina o oloa fa'atauina mai fafo. O lenei tulaga lelei e āfua mai i vaega eseese, aemaise lava ona o le tele o tupe fa'ameaalofa mai pa'aga mo atiina'e. Sa fa'apea fo'i ona si'itia tupe fa'amomoli mai fafo ma tupe maua mai i tagata tafafao maimoa ua fesoasoani lea i le fa'atupula'ia o tupe fa'afesuia'i mai fafo o lo'o 'umia e faletupe, lea e toe fa'atau atu i le Faletupe Tutotonu o Samoa. E le gata i lea, o se vaega o lenei si'itaga, o lo'o atagia mai ai foi le tului na maua mai tupe fa'afesuia'i mai fafo ona o tulaga lelei o tului i le lalolagi. Ua fuafuaina le fa'alauteleina atili o tupe

fa'aagaga mo fefa'ataua'iga i le \$62.5 miliona talā i le fa'ai'uga o Iuni 2026, e aofia ai ma fesoasoani tau tupe tu'usa'o i le Mālō. O lo'o fuafuaina fo'i le si'itia o tupe fa'aagaga i atunu'u i fafo mo fefa'ataua'iga i tausaga o i luma, ae o lo'o fuafuaina le si'itia o oloa e fa'atauina mai fafo ma tupe totogi mo nonōgātupe e ono fa'apaleni ai le si'itaga o tupe fesoasoani mai pa'aga mo atiina'e, fa'apea le si'itaga o tupe fa'amomoli mai fafo, tupe maua o tagata faigaluega fa'avaitaimi ma tupe maua mai tagata tafafao maimoa.

Va'aiga i le Lumana'i mo le TF2025/26 i le TF2028/29

Pusa 4.1: Fa'amaumauga o Fuainumera o le Tamāo'āiga

	TF2025/26	TF2026/27	TF2027/28	TF2028/29
Tulaga i le Tamāo'āiga				
Tamāo'āiga (milionā talā)	3,611.1	4,103.6	4,390.2	4,657.02
Tamāo'āiga Fa'atulagaina (2013 tau fa'atulagaina) (milionā talā)	2,708.8	2,807.8	2,905.1	2,993.2
% Fa'atupula'ia	4.5	3.7	3.5	3.0
Paleni o le Tala o le Tupe				
Paleni o le Tala o le Tupe (milionā talā)	-126.2	-113.6	-112.2	-106.8
Tupe Maua				
Aofa'iga o Tupe Maua (milionā talā)	941.7	999.6	1,047.5	1,039.9
Tupe Maua i Lafoga (milionā talā)	664.6	678.6	682.9	695.3
Tupe Maua Fa'ameaalofa (milionā talā)	163.8	206.8	250.2	230.1
Isi Tupe Maua (milionā talā)	113.4	114.2	114.4	114.5
Tupe Maua (% o le Tamāo'āiga)	26.1	24.4	23.9	22.3
Tupe Maua i Lafoga (% o le Tamāo'āiga)	18.4	16.5	15.6	14.9
Tupe Maua i Meaalofa (% o le Tamāo'āiga)	4.5	5.0	5.7	4.9
Isi Tupe Maua (% o le Tamāo'āiga)	3.1	2.8	2.6	2.5
Aofa'iga o Tupe Fa'aalu				
Aofa'iga o Tupe Fa'aalu (milionā talā)	1,067.9	1,113.1	1,159.7	1,146.7
Tupe Fa'aalu mo Galuega Fai (milionā talā)	935.5	862.7	933.6	919.4
Fa'amaumauga o Fefa'ataua'iga o Aseta (milionā talā)	132.4	250.4	226.0	227.4
Aofa'iga o Tupe Fa'aalu (% o le Tamāo'āiga)	29.6	27.1	26.4	24.6
Tupe Fa'aalu o Galuega Fai (% o le Tamāo'āiga)	25.9	21.0	21.3	19.7
Fa'amaumauga o Fefa'ataua'iga o Aseta (% o le Tamāo'āiga)	3.7	6.1	5.1	4.9
Fesoasoani a le Mālō (milionā talā)	28.5	28.5	28.5	28.5
Fesoasoani a le Mālō (% o le Tamāo'āiga)	0.8	0.7	0.6	0.6
Nonōgātupe a le Mālō				
Nonōgātupe a le Mālō (milionā talā)	680.3	621.2	644.2	623.8
Nonōgātupe a le Mālō i le Tamāo'āiga (totonu o le 50%)	18.8	15.1	14.7	13.4

	TF2025/26	TF2026/27	TF2027/28	TF2028/29
Aofa'iga Tupe Totogi mo Nonōgātupe (milionā talā)	89.4	89.1	79.1	74.8
Tupe Totogi mo Nonōgātupe i Tupe Maua (e lē aofia ai tupe Fa'ameaalofa) (totonu o le 20%)	10.3	10.1	8.9	8.3

Fa'amatalaga: Matagaluega o Tupe, Faletupe Tutotonu o Samoa, ma le Ofisa o Fuainumera Fa'amauiina

O le tamāo'āiga o Samoa i le TF2025/26 o lo'o fuafua e fa'atupula'ia i le 4.5 pasene, o se fetu'una'iga mai le 3.7 pasene sa lipotia i le Fa'amatalaga o Fuafuaga mo Tupe a le Mālō 2024/25. O lenei fuafuaga e aofia ai galuega tetele tau tamāo'āiga e pei o le fa'aauauina o le fa'atinoga o atiina'e a le Mālō i ni isi o vaega maoti o le tamāo'āiga, fa'amae'aina o le maketi i Savalalo, le Fale Teu Oloa i Atele, le Ofisa a le Matagaluega o Fa'ato'aga ma Faigafaiva i Savai'i, ma le fausiaina o le Faleā'oga a le SENESE. E aofia ai foi le fa'atinoina o le vaega mulimuli o le si'itaga o totogi maualalo, le taligāmālō i le fonotaga fa'aitulagi a le Komiti Fa'afoe a le PFTAC, fa'apea ma le Faigapalota Tele a Samoa talu ai nei. O lo'o aofia fo'i i lea va'aiga taula'i le fa'atinoina o Poloketi tau Fela'ua'iga e aofia ai le Poloketi Fesoasoani mo Samoa i le Tali Atu i Suiga o le Tau, Polokalame mo le Fa'aleleia o le Uafu a Samoa, le Fesoasoani mo le Fa'aleleia o Auala Tetele, le Fesoasoani mo Atiina'e Itulagi o Va'alele Sivili ma Auala Tetele, le Poloketi mo Feso'ota'iga Fa'atekonolosi, ma le Poloketi mo le Fausiaina o le Fa'atanoa i Alaoa, lea o le a si'itia ai atiina'e tetele a le atunu'u. Ua fa'amoemoe fo'i e fa'aauau pea ona fa'atupula'ia le aofa'i o tagata tafafao maimoa mai, ona o galuega toe fa'aleleia sa fa'atino i lea vaega maoti a'o tāpena i le talimālō ai i le Fonotaga a Fa'auluuluga o Mālō o le Taupulega (CHOGM). O fesoasoani tau tupe mo le atiina'e o fa'ato'aga, tagata tafafao mai, oloa gaosi, fale ma atiina'e tetele fa'atasi ai ma pisinisi laiti, fa'apea le atiina'e o tagata faigaluega o le a fa'atupula'ia atili ai le tamāo'āiga. O nei vaegātupe, atoa ai ma le fetu'una'iga fa'avae tau tupe e si'itia ai tupe maua ma fa'aitiitia ai le tau o nonōgātupe, o lo'o fuafua e una'ia ai le vaega tumaoti, fa'atupula'ia ai avanoa faigaluega, ma fa'atūmauiina ai le si'itia o le tamāo'āiga. E lē gata i lea, o le fa'amae'aina o fuafuaga i le Ta'iala mo le Lumana'i Manuia o Samoa o le a fesoasoani i le fa'atupula'ia lea o le tamāo'āiga fa'atasi ai ma le si'itia o tupe fa'aalu mo atiina'e.

O le va'aiga taula'i o le tamāo'āiga mo le TF2026/27 e tusa lea ma le 3.7 pasene, ona o le fa'atinoina o vaega fa'amuumua mo le isi TLMS. O nei vaega fa'amuumua o le a si'itia ai atiina'e mo le soifuaga lautele, fa'alauteleina atiina'e mo le vaega tumaoti, fa'apea le fa'amausalīina o galuega ma atiina'e tetele a le Mālō. E aofia ai fo'i ma le fa'atinoina o poloketi tetele o lo'o i totonu o le Polokalame Tau Atiina'e a le Mālō (PSIP), ma le fa'alauteleina o auaunaga tau femālaga'aiga, o faletalimālō, fale gaosi oloa, ma faiga fa'ato'aga fa'apisinisi auā le ūna'ia o oloa auina atu i fafo, lea o le a atili ai le fa'atupula'ia o vaega o Galuega Tetele, Fela'ua'iga, Feso'ota'iga, Faletalimālō ma Fale'aiga, Fale Gaosi Oloa fa'apea ma isi vaega tau pisinisi e feso'ota'i ai. O le si'itia o le vaegātupe mo le Polokalame mo le Atiina'e o Itūmālō i le \$2 milionā talā mo itūmālō ta'itasi o le a amatalia i le TF2026/27 – o se fesoasoani tu'usa'o mo poloketi tau

fa'ato'aga, faigafaiva, ma atiina'e tetele – o le a fa'amalosia ma fa'amausaliina ai pea le tamāo'aiga o nu'u ma alalafaga. O isi fuafuaga e aofia ai le si'itaga o le totogi maualalo, ma le fa'aauauina o si'itaga mo le penisiona, o le a fesoasoani i tupe maua a aiga. O le fa'atupula'ia o tupe fa'amomoli mai fafo ma le fa'alauteleina o auaunaga ma fa'amatalaga fa'atekonolosi, o le a fesoasoani fo'i i lea si'itaga. O le si'itia o avanoa e mafai ai ona maua nonōgātupe mo pisinisi, o sao o tatou tagātānu'u i fafo, ma alagātupe fou e ono maua mai i le Polokalame mo Tupe Teufa'afaigaluega mo Sitiseni, o le a si'itia ai tupe maua ma fa'atupula'ia ai le tamāo'aiga. O nei fuafuaga uma o lo'o atagia ai le fa'amuumua a le Mālō i le atiina'e o le soifuaga lautele, le gafataulimaina o le tamāo'aiga, ma le fa'aagava'aina o alalafaga, ina ia mautinoa ai le fa'alauteleina o le tulaga si'itia o le tamāo'aiga ma aofia ai tagata uma.

I le TF2027/28 ma le TF2028/29, o le va'aiga taula'i mo le fa'atupula'ia o le tamāo'aiga e tusa lea ma le 3.5 pasene ma le 3.0 pasene, i le toe fo'i ai o le tamāo'aiga i lona tulaga masani. O poloketi tetele ua fuafuaina e pei o le fa'alauteleina o auaunaga o femālaga'aiga i le ea, o vaegātupe mo le vaega o tagata tafafao maimoa, o le atiina'e o pisinisi laiti, ma pisinisi tau fa'ato'aga, o le a fesoasoani i le fa'atūmauina o le tulaga lelei o le tamāo'aiga. O le vaega lona lua ma le tolu o le \$2 miliona talā mo itumālō i tausaga nei, o le a lagolagoina ai le fa'aagava'aina ma atiina'e o nu'u ma alalafaga. O le fa'aauauina fo'i o le fa'atinoina o atiina'e tetele o le a fa'ama'ite atili ai le fa'atupula'ia o le tamāo'aiga i lona tulaga masani. O le alualu fo'i i luma o le fa'atupula'ia o le tamāo'aiga ona o le si'itia o tupe fa'aalu a le Mālō i tausaga nei, o lo'o fuafua e toe fo'i i lona tulaga masani i isi tausaga i luma atu, i le tusa lea ma le 3.0 pasene e ōgatusa ai ma le tapula'a fa'aletausaga.

Fa'amatalaga o Tupe a le Mālō mo Tausaga o Lumana'i

Tala Fa'atatau o le Tupe 2025/26 – 2028/29

E tusa ai ma aiaiga o le Vaega 18 o le Tūlāfono i le Pūleaina o Tupe a le Mālō 2001, e tu'uina atu ai le Fa'amatalaga o Tupe a le Mālō mo le tausaga fa'aletupe 2025/26 ma tausaga fa'aletupe e tolu o lo'o lumana'i mo le silafia.

Aotelega

O lo'o fa'aauau pea ona si'itia vaegātupe fa'atatauina mo tupe alu a le Mālō i le TF2025/26, e atagia ai le ūna'ia o galuega fa'atino ma le fa'amoemoe i le fa'amae'aina o le Ta'iala mo le Lumanai Manuia o Samoa (TLMS). O ni isi o vaega o lo'o ave iai le fa'amuumua a le Mālō i lenei talafa'atatau o le tupe 2025/26, e aofia ai le fa'amausaliina o atiina'e e aiā tutusa ai tagata uma, e aofia ai le fa'amautūina o le soifua manuia lautele, atiina'e o nu'u ma afio'aga, ma le fa'aleleia atili o Ofisa a le Mālō. Ua fetu'una'i ai nei le tapula'a fa'atūlagaina mo le fa'asiliga o tupe fa'aalu nai lo'o tupe maua, i le 3.5 pasene o le tamāo'āiga, e atagia ai le siitia o vaegātupe fa'afaigaluegaina mo vaega maoti o lo'o ave iai le fa'amuumua. O le a gafatia lea pe a fa'atusa atu i le va'aiga taula'i i le tamāo'āiga, ma le si'itaga fuafuaina i le aoina o Tupe Maua, ae le gata i lea o le tulaga tu'uititia o lo'o iai nei aitalafu a le Mālō. E fa'amoemoe o le a fa'aaupagaina ai faiga pa'aga ma nu'u ma afio'aga, fa'alapotopotoga tumaoti, le au faipisinisi, ma pa'aga mo ati'ina'e, e una'ia ai atiina'e mausalī ma le gafataulimaina.

O lo'o tu'uina atu i le Fa'amatalaga o Tupe a le Mālō le fuafuaga o lo'o iai mo le fa'asiliga o tupe alu nai lo'o tupe maua, e tusa lea ma le 3.5 pasene o le tamāo'āiga i le TF2025/26, ona fa'aititia lea i le 2.8 pasene i le TF2026/27, 2.6 pasene i le TF2027/28, ma le 2.3 pasene i le TF2028/29. O lenei tulaga o lo'o atagia ai le tumau pea o le naunauta'iga a le Mālō ina ia mausalī le pūleaina lelei o tupe, ina ia gafataulimaina le fa'atinoina o vaega fa'amuumua mo le atiina'eina o nu'u ma alalafaga, aemaise le fa'aleleia o auaunaga a le Mālō.

Pusa 4.2: Aotelega o Tupe Maua ma Tupe Alu (miliona talā)

	2025-26	2026-27	2027-28	2028-29
TUPE MAUA				
Tupe Maua Masani	866.9	879.4	884.2	896.7
Tupe Faameaalofa	163.8	206.8	250.2	230.1
Aofaiga o Tupe Maua Masani ma Tupe Faameaalofa	1,030.7	1,086.1	1,134.3	1,126.8
<i>Toese</i>				
TUPE ALU				
Tupe Alu Faale-Tulafono	158.7	158.5	158.5	158.5
Tupe Alu I Polokalame	921.3	927.0	935.1	915.1
Faagaioiga o Matagaluega	450.5	459.9	438.5	438.5
Faagaioiga o Faalapotopotoga ma Isi Vaega	143.7	140.1	140.1	140.1
Galuega e Avea ai ma Sui o le Malo	327.1	327.0	356.4	336.4
Tupe Alu le Fuafuaina	27.6	27.8	28.1	27.5
Aofaiga o Tupe Alu	1,107.5	1,113.4	1,121.6	1,101.0
<i>toese</i>				
TUPE ALU MO ATINAE				
Tupe Alu I Atina'e Faatupeina I Tupe Faamaealofa	134.0	171.0	209.5	217.2
Aofaiga o Tupe Alu i Atina'e	134.0	171.0	209.5	217.2
Aotelega Tupe Faasili/(Tupe Pa'u)	(210.9)	(198.2)	(196.8)	(191.4)
Faatupeina e:				
Fesoasoani Tu'usa'o mai e Pa'aga aua le Tala I le Tupe	132.4	82.4	82.4	109.9
Tinoitupe (Tupe Pa'u)/Tupe Faasili	(78.5)	(198.2)	(196.8)	(191.4)

Fa'amatalaga: Matagaluega o Tupe

Tupe Maua Masani

O Tupe Maua Masani mo le TF2025/26, o lo'o fuafua e si'itia i le 8.0 pasene, e ono o'o atu i le \$866.9 miliona talā, ona o le si'itia o lafoga fa'atulagaina mo le aoina e le Matagaluega mo Tupe Maua ma le Matagaluega o Tiute, e fa'apea fo'i ma tupe maua mai tupe mamā a Fa'alapotopotoga ma alaga'oa fou ua fa'amaonia mo le aoina. E aofia ai fo'i Lafoga mo Otaota Lafoa'i, lea o le a fa'amalosia i le aso 1 o Ianuari 2026. O ni isi o tupe maua mai le tāina o le vaomatua i Masamasa, lea o le a fesoasoani ai i le si'itia o taumafaiga i le puipua o aseta fa'alenua a le Mālō. O lo'o manino mai ai fo'i le si'itaga o tupe totogi fuapauina mo auaunaga pe a tu'ufa'atasi le Fa'alapotopotoga o Eleele a Samoa ma le Matagaluega o Eleele ma Fua Fanua, fa'apea le Pulega o Fale ma Malae Ta'alo a Samoa ma le Matagaluega o Ta'alogā ma Alagā'oa mo le Fiafiaga o Tagata.

O lo'o fuafua e o'o atu i le \$879.4 miliona talā vaegātupe e aoina mo le TF2026/27, \$884.2 miliona talā mo le TF2027/28, ma le \$896.7 miliona talā mo le TF2028/29. O lenei fa'asiliga o lo'o atagia ai le fa'amausaliina o le auaunaga a le Matagaluega o Tiute ma le Matagaluega mo Tupe Maua, fa'apea le si'itia ai o tupe fa'aalu e le mamalu o le

atunu'u, ae maise lava i le fa'aaogaina o vaegātupe fa'amatu'uina atu i le Polokalame o Atiina'e o Itumālō, e fesoasoani lea i le si'itia o lafoga aoina i luga o oloa ma auaunaga.

Tupe Fa'ameaalofa mai Fafo

O Tupe Fa'ameaalofa mai Fafo mo le TF2025/26 o lo'o fuafua e tu'uititia i le 17.0 pasene, e atagia ai le fa'amae'aina o galuega fa'atino mo le Fonotaga a Fa'auluuluga o Mālō o le Taupulega ia Oketopa 2024, ma le fa'amae'aina o le ni isi o poloketi mo le vaega maoti o Fa'ato'aga ma Faigafaiva fa'apea ma le Si'osi'omaga. Ae peita'i, o lo'o fuafua e si'itia tupe fa'ameaalofa mai fafo i le TF2026/27 ma le TF2027/28 ona o le fa'atinoina o poloketi fa'aauau fa'apea ma ni isi o atiina'e fou o lo'o fuafuaina. I le TF2028/29, o le tu'uititia o tupe fa'ameaalofa o le a lagolagoina e nonōgātupe (tului maualalo) mai fafo ona o suiga i le agava'a o Samoa i nei fesoasoani – i le 50.0 pasene tupe fa'ameaalofa ma le 50.0 pasene o tupe nonō – mai le Faletupe a le Lalolagi ma le Faletupe o Atiina'e o Asia. O le a fuafuaina fo'i ni isi nonōgātupe e māmā tului mai le Faletupe o Atiina'e Tetele o Asia. O lo'o ave pea le fa'amuamua a le Mālō i le fa'amalosia atili ma le fa'aleleia o le fa'atinoina ma le mata'itūina o nei fesoasoani mai fafo, ina ia mautinoa ai le ōgatasi o nei fesoasoani ma vaega fa'amuamua a le Mālō.

Tupe Fa'aalu

O Tupe Fa'aalu mo le TF2025/26 ua fuafua e si'itia e o'o atu i le \$1.11 piliona talā e tusa lea ma le 12.0 pasene mai le tausaga talu ai. E ōgatusa lea si'itaga ma le fa'ataua a le Mālō mo le si'itia o vaegātupe fa'afaigaluegaina mo auaunaga autū. O nei vaegātupe e lagolagoina ai pea le fa'atupula'ia o polokalame mo le soifua manuia, ma fa'amalosia ai fo'i atiina'e i vaega maoti o le Soifua Mālōlōina, A'oa'oga, fa'apea Fefa'ataua'iga, Pisinisi, ma Oloa Gaosi.

O lenei aofa'iga o lo'o fuafua e si'itia i le TF2026/27 e tusa ma fuafuaga a le Mālō i le fa'atinoina o vaega autū o le a fa'ata'atitia i le isi TLMS. O ni isi o vaegātupe fa'atatauina o lo'o afua ai lenei si'itaga maualuga, o le Polokalame o Atiina'e o Itumālō lea o le a si'itia maualuga mai le aofa'iga e \$91.8 miliona talā i le TF2025/26 i le \$102.0 miliona talā mo le TF2026/27. E aofia ai fo'i le fa'atinoina o le vaega lona lua o le si'itaga o penisiona mo tagata matutua e 70 tausaga ma sili atu, mai le \$300 talā i le \$500 talā. O nei gasologa uma, e atagia ai le naunauta'iga a le Mālō, e fa'atupula'ia le tamāo'āiga i se tulaga tutusa mo tagata uma.

Tupe Fa'aalu mo Atiina'e

O Tupe Fa'aalu mo Atiina'e e fa'atupeina i tupe mai pa'aga mo atiina'e, o lo'o fuafua e fa'aitiitia mai le \$171.1 miliona talā i le TF2024/25 i le \$134.0 miliona talā mo le TF2025/26, e atagia ai le fa'amae'aina o ni isi o atiina'e tetele e aofia ai le Poloketi Fesoasoani mo le Au Faifa'ato'aga, Au Faifaiva ma le Maketiina mo Fefa'ataua'iga (SAFPROM Project), Polokalame a le Pasefika e Tali atu ai i A'afiaga o Fesuaiga o le Tau ma Fa'alavelave Matuia (PREP), o le Poloketi mo le Mata'itūina o Lōloga ma le Tali Atu i Suiga o le Tau mo Fanua Apovai i Vaisigano (GCF-VCP), ma fesoasoani mo taligāmālō i le Fonotaga a Fa'auluuluga o Mālō o le Taupulega (CHOGM). O le TF2026/27, TF2027/28, ma le TF2028/29 o lo'o fuafua e si'itia ona o le fa'atinoina o atiina'e fa'aauau ma atiina'e o lo'o tapenaina e amata fa'atino i lea piriota. Ua fa'amautūina e le Mālō ni isi o fesoasoani fou mai ana pa'aga mo atiina'e e aofia ai le Faletupe a le Lalolagi, le Faletupe o Atiina'e o Asia, Niu Sila, Ausetalia, ma le Polokalame tau Atiina'e a Mālō Aufa'atasi e lagolagoina ai atiina'e i vaega maoti o le Soifua Mālōlōina, Si'osi'omaga, Mālosi'aga, ma Tupe ua fuafuaina e fa'amaonia ma amata le fa'atinoina i le TF2026/27 ma le TF2027/28.

Aofa'iga Mo'omia Fa'a'unegatupe/Nonōgātupe

O le Pusa 4.3 o lo'o fa'ailoa ai le fa'atulagaina o le Tala o le Tupe a le Mālō i lalo o le Auivi o Fa'amaumauga o Tupe tau i le Mālō (GFS), lea o lo'o fa'aaogaina e le tele o Fa'alapotopotoga Tau Tupe a le Lalolagi e fa'atino ai fa'atusatusaga fa'avāomālō.

Pusa 4.3: Fa'amatalaga o Tupe a le Mālō

GAIOIGA E AAFIA AI MEATOTINO	2025-26	2026-27	2027-28	2028-29
TUPE MAUA	941.7	999.6	1,047.5	1,039.9
Lafoga	664.6	678.6	682.9	695.3
Tupe Faameaalofa	163.8	206.8	250.2	230.1
Isi Tupe Maua	113.4	114.2	114.4	114.5
TUPE ALU	935.5	862.7	933.6	919.4
Faamanuiaga ma totogi mo tagata faigaluega	352.7	364.9	343.9	343.9
Faaaogaina o oloa ma auaunaga	224.2	124.9	190.7	196.4
Tului	9.5	9.5	9.5	9.5
Tupe Faamatuu Atu Faameaalofa	28.5	28.5	28.5	28.5
Tupe Faameaalofa	244.8	240.6	266.6	246.6
Faamanuiaga mo le Soifua Manuia	70.3	88.9	88.9	88.9
Isi Tupe Alu	5.6	5.6	5.6	5.6
PALENI O TUPE MAUA MA TUPE ALU	6.2	136.8	113.9	120.6
AOFAIGA O MEATOTINO E LE O NI TINOITUPE	132.4	250.4	226.0	227.4
Aseta Tumau	123.4	245.9	221.5	222.9
Aseta e le Gaosia	9.0	4.5	4.5	4.5
AOFAIGA MOOMIA FAAUNEGATUPE/NONOGATUPE	-126.2	-113.6	-112.2	-106.8
AOTELEGA O MEATOTINO MA NOATAGA	-126.2	-113.6	-112.2	-106.8
SUIGA I MEATOTINO O ASETA TAU TUPE	-213.4	-200.7	-199.3	-193.9
ESESEGA O TUPE TOTOGI MO AITALAFU	-87.1	-87.1	-87.1	-87.1

Fua Faatatau o le Tamaoaiga (Estimated Nominal GDP) miliona o	3611	4104	4390	4657
Faasiliga o Tupe Alu mai Tupe Maua	-3.5%	-2.8%	-2.6%	-2.3%
<i>Fa'amatalaga: Matagaluega o Tupe</i>				

O le aofa'iga o Tupe Maua o lo'o fuafuaina mo le TF2025/26, e āfua mai lea i le fa'atupula'ia o lafoga e aoina mai totogi, tupe fa'asili, ma tupe fa'asili o aseta, fa'apea lafoga o oloa ma auaunaga. O le a fesoasoani tele foi le fa'atupula'ia o vaegātupe fuafuaina e aoina mai tupe mamā a fa'alapotopotoga i lenei si'itaga maua.

Ua fa'amauiaina foi le fa'aititia o aseta tumau mo le TF2025/26 i le \$123.4 miliona talā, o lo'o atagia ai fo'i le mae'a o le fa'atinoina o le tele o galuega tetele a le Mālō ma le fetu'una'iga o nei galuega i se tulaga gafataulimaina. O le fa'atupula'ia o le tau fuafuaina o aseta tumau mo tausaga fa'aletupe o lo'o lumana'i, e atagia ai galuega tetele a le Mālō o lo'o fuafuaina, e pei ona fa'amaonia mai fa'atalatalanoaga ma pa'aga mo atiina'e.

TUPE MAUA

O le au'ili'iliina o tupe maua a le Mālō i le mae'a ai o le to'esea o lafoga toe totogi atu, o lo'o tu'uina atu i le Pusa 4.4:

Pusa 4.4: Fa'amatalaga o Tupe Maua

	2025-26	2026-27	2027-28	2028-29
TUPE MAUA	941.7	999.6	1,047.5	1,039.9
Lafoga	664.6	678.6	682.9	695.3
tupe faavae	149.4	157.4	160.6	169.1
Lafoga o tagata taitoatasi	92.7	97.4	99.2	104.2
Lafoga totogi e faalapotopotoga ma isi Kamupani	56.7	60.0	61.3	64.9
Lafoga o Aseta Tumau	0.5	0.5	0.5	0.5
Lafoga o auaunaga tau tupe ma galuega tetele	0.5	0.5	0.5	0.5
Lafoga o Oloa ma Auaunaga	425.7	431.8	433.0	436.8
Lafoga lautele o oloa ma auaunaga	232.9	238.9	240.1	244.0
Tiute Faaopoopo (Excise)	177.4	177.4	177.4	177.4
Lafoga o auaunaga faapitoa	15.0	15.0	15.0	15.0
faaaoga oloa	0.44	0.4	0.4	0.4
Lafoga o fefaatauaiga ma atunuu i fafo	88.9	88.9	88.9	88.9
Tiute ma isi lafoga	88.9	88.9	88.9	88.9
Tupe Faameaalofa	163.8	206.8	250.2	230.1
Tupe Faameaalofa mai Malo i Fafo	163.8	206.8	250.2	230.1
Masani	43.0	52.9	61.6	34.6
Faavae	120.8	153.9	188.6	195.4
Isi Tupe Maua	113.4	114.2	114.4	114.5
Tupe Maua mai Aseta a le Malo	61.8	61.8	61.8	61.8
Tului	3.0	3.0	3.0	3.0
Faamanuiaga maua mai Faalapotopotoga	52.0	52.0	52.0	52.0
Tupe Maua mai Fale Mautotogi a le Malo	6.8	6.8	6.8	6.8
Tupe Maua mai Faatauina o oloa ma auaunaga	34.6	35.5	35.6	35.7
Tupe Alu mo le faagaioiga o auaunaga	4.8	5.4	5.4	5.4
Tupe faaola mai isi vaega i le Malo	29.8	30.0	30.2	30.3
Tupe Maua mai Faasalaga ma le tuai ona totogi	16.9	16.9	16.9	16.9

Fa'amatalaga: Matagaluega o Tupe

Tupe Maua mai i Lafoga

O le si'itia o tupe maua mai lafoga i le \$664.6 miliona talā mo le TF2025/26, o lo'o iloga ai le alualu pea i luma o galuega fa'atino ma le mata'itūina o le aoina o nei vaegātupe, e aofia ai ma le ūna'ia o pulega lelei ma ta'iala e limata'ita'iina ai lona fa'atinoina. O lenei si'itaga o lo'o lagolagoina e le fa'alauteleina o le Polokalame mo le Atiina'e o Itumālō ma le si'itia o fefa'ataua'iga i totonu o le atunu'u, lea e ono fa'atupula'ia ai tupe maua mai lafoga. I isi tausaga e tolu o lumana'i, o lo'o fuafuaina e itiiti se si'itaga, e tusa lea ma le \$678.6 miliona talā i le TF2026/27, \$682.9 miliona talā i le TF2027/28, ma le \$695.3 miliona talā i le TF2028/29.

Tupe Fa'ameaalofa mai Pa'aga mo Atiina'e

O tupe fa'ameaalofa o lo'o fuafua e fa'aititia mai le \$196.8 miliona talā mo le TF2024/25, i le \$163.8 miliona talā mo le TF2025/26, ua manino ai le fa'amae'aina o ni isi o atiina'e tetele ma fesoasoani mo le Fonotaga a Fa'auluuluga o Mālō o le Taupulega i le 2024. O fuafuaga mo tupe i le isi tolu tausaga o lumana'i, o lo'o atagia ai fesoasoani ua fa'amautūina mai Pa'aga mo Atiina'e auā atiina'e fou a le Mālō o lo'o fuafuaina.

Tupe Maua e Ese Mai i Lafoga (Tupe Totogi Fuapauina mo Auaunaga)

O lo'o fuafua e si'itia tupe maua e ese mai i lafoga i le \$113.4 miliona talā mo le TF2025/26, ona fa'atupula'ia lea i le \$114.2 miliona talā i le TF2026/27, ma fa'asolo ai pea nei vaegātupe aoina i lea tulaga mo tausaga fa'aletupe o lumana'i. O lenei si'itaga e mafua mai i le fa'atupula'ia o tupe maua mai aseta a le Mālō ma tupe maua mai le fa'atauina o oloa ma auaunaga. O se vaega o nei tupe maua e aoina mai i fa'asalaga ma le tuai ona totogi, o lo'o fuafua e si'itia i le \$16.9 miliona talā i le TF2025/26 ma fa'atūmauina ai i isi tausaga i luma. O lo'o atagia mai i nei fuainumera le mausalī o le va'aiga taula'i mo tupe maua e ese mai i lafoga, e lagolagoina ai le aotelega o le tala o le tupe.

TUPE FA'AALU

O le Pusa 4.5 o lo'o folasia ai le au'ili'iliina o tupe alu a le Mālō ua fuafuaina mo tausaga lumana'i, ma e lē o aofia ai fefa'ataua'iga i le vā o Matāgaluega a le Mālō.

O lenei pusa, o lo'o au'ili'ili ai le toe fetu'una'iga o le vaega e fa'amauina ai fesoasoani a le Mālō mo ana Fa'alapotopotoga, ua tu'uina nei i lalo o "Tupe Fa'ameaalofa mo Isi Vaega o le Mālō". O lenei suiga e āfua mai i fa'atalatalanoaga ma le Ofisa o Fuainumera a Samoa, fa'apea foi le iloiloga sa fa'atautaia e le IMF, ina ia ōgatusa lipoti a le Matagaluega o Tupe ma le Ofisa o Fuainumera. O lo'o fa'amaonia lenei fa'atulagana fou i le pa'ū maualalo ai o "Fa'amanuiaga mo Tagata Faigaluega" ma le "Fa'aaogaina o Oloa ma Auaunaga", ae si'itia ai le fuainumera fa'atulagaina mo "Vaega Fa'ameaalofa mo Isi Vaega o le Mālō" e pei ona ta'ua i luga.

Pusa 4.5: Fa'amatalaga o Tupe Alu

	2025-26	2026-27	2027-28	2028-29
TUPE ALU	935.5	862.7	933.6	919.4
Faamanuiaga mo Tagata Faigaluega	352.7	364.9	343.9	343.9
Tupe Totogi	320.0	330.9	311.4	311.4
Totogi - tinoitupe	319.9	330.9	311.4	311.4
Totogi - faameaalofa	0.06	0.06	0.06	0.06
Isi Faamanuiaga	32.7	34.0	32.5	32.5
Actual social contributions	32.7	34.0	32.5	32.5
Faaaogaina o Oloa ma Auaunaga	224.2	124.9	190.7	196.4
Tului	9.5	9.5	9.5	9.5
Mo i latou e le o ni tagata- nuu Samoa	9.2	9.2	9.2	9.2
Mo tagata-nuu e le aofia ai le Malo	0.3	0.3	0.3	0.3
Tupe Faamatuu Atu Faameaalofa	28.5	28.5	28.5	28.5
Faalapotopotoga a le Malo	28.5	28.5	28.5	28.5
Tupe Faameaalofa	244.8	240.6	266.6	246.6
Mo faalapotopotoga i Fafo	5.1	4.7	4.7	4.7
Tupe Faameaalofa mo Isi Vaega o le Malo	239.7	235.8	261.9	241.9
Faamanuiaga mo le Soifua Manuia	70.3	88.9	88.9	88.9
Faamanuiaga fesoasoani tupe	69.9	88.5	88.5	88.5
Faamanuiaga mo Fale Faigaluega	0.4	0.4	0.4	0.4
Isi Tupe Alu	5.6	5.6	5.6	5.6

Fa'amatalaga: Matagaluega o Tupe

Fa'amanuiaga mo Tagata Faigaluega

E pei ona fa'ailoa atu i le Pusa 4.5 o i luga, o lo'o fuafua e fa'aititia le fa'amanuiaga mo tagata faigaluega e tusa lea ma le \$352.7 miliona talā mo le TF2025/26. O vaega o lo'o ūnā'ia le vaegātupe fa'atatauina mo nei fa'amanuiaga, e aofia ai le si'itia o le totogi mo le aufaigaluega a le Matagaluega o Leoleo, Fale Puipui, ma le Ola Toe Fuata'ina e tusa ai ma le iloilogia a le Komiti Faufautua o Totogi. E le gata i lea, o le tu'ufa'atasia o le Fa'alapotopotoga o Elelee a Samoa ma le Matagaluega o Elelee ma Fua Fanua, atoa ai ma le tu'ufa'atasia o le Pulega o Fale ma Malae Ta'alo ma le Matagaluega o Ta'aloga ma Alagā'oa mo le Fiafiaga o Tagata, ua si'itia ai le numera o tagata faigaluega a le Mālō.

Fa'aaogaina o Oloa ma Auaunaga

O le Fa'aaogaina o Oloa ma Auaunaga, o lo'o fuafuaina e tusa lea ma le \$224.2 miliona talā mo le fa'atupeina o galuega mo'omia uma a le Mālō, e aofia ai ma le fa'atauina o oloa ma auaunaga, fa'atupeina o galuega fa'aleleia, fa'apea ma le ūnā'ia o pulega lelei. O lo'o fuafuaina le si'itia o nei vaegatupe mo tausaga e lua o lo'o lumana'i, e atagia ai le fa'aauau pea o polokalame masani, e ūnā'ia ai le fa'afaigaluegaina o vaegātupe mo atiina'e ma galuega tetele.

Polokalame Fa'amāmā Avega a le Mālō

O le si'itaga i le TF2025/26, o lo'o atagia ai le fa'aopoopoga o fesoasoani tu'usa'o tau tupe mo le vaega maoti o A'oa'oga (One Government Grant). O le fa'amoemoe o lenei si'itaga, o le fa'asafuaina lea o lenei fesoasoani i a'oga uma e le'i aofia muamua i lenei polokalame. E aofia ai fo'i ma vaegātupe e tu'uina atu i Fa'alapotopotoga a le Mālō e aofia ai le Pulega o Suavai (SWA) ma le Fa'alapotopotoga mo Mālosi'aga tau Eletise (EPC) auā galuega fa'amāmā avega mo le atunu'u.

Tupe Fa'amatu'u atu Fa'ameaalofa

I le 'au'ililiga ua tu'uina atu i luga, o lo'o fuafuaina e si'itia maualuga Tupe Fa'amatu'u atu Fa'ameaalofa i le tusa lea ma le \$244.8 miliona talā i le TF2025/26, mai le \$24.0 miliona talā i le TF2024/25, ma fa'aauau pea ona fa'amauiina si'itaga fuafuaina mo nei vaegātupe mo tausaga fa'aletupe e tolu o soso'o ai pe a fa'atusa i le TF2024/25. O le si'itaga maualuga i le TF2025/26, e āfua mai i le toe fetu'una'iga i lalo o le Auivi o Fa'amaumauga o Tupe tau i le Mālō (GFS) e pei ona tā'ua i luga, fa'apea ma le maualuga o tupe fa'amatu'u atu fa'ameaalofa i Fa'alapotopotoga a le Mālō ma Fa'alapotopotoga Tūmaoti, fa'apea le Polokalame o Atiina'e mo Itumālō.

Fa'amanuiaga mo le Soifua Manuia

O fa'amanuiaga mo le soifua manuia o lo'o fuafua e si'itia i le \$70.3 miliona talā mo le TF2025/26, ma toe si'itia i le \$88.9 miliona talā i le TF2026/27, ma fa'atūmauiina ai i lea aofa'iga i tausaga fa'aletupe o lumana'i. O lenei si'itaga e atagia ai le naunauta'iga a le Mālō ina ia una'ia polokalame e fa'amalosia ai le soifuaga lautele. E aofia i nei vaega le si'itia o vaegātupe fuafuaina mo le auina atu o gasegase mo togafitiga i fafo mai le \$6.0 miliona talā i le TF2024/25 i le \$12.0 miliona talā i le TF2025/26, fa'apea si'itaga i le penisiona mo tagata matutua ma fesoasoani mo i latou e iai a'afiaga tumau o le soifua e pei ona tā'ua i luga. E ao ina manino, o le vaega lona lua o le si'itaga o le penisiona mo tagata matutua i luga atu o le 70 tausaga lea e si'itia ai i le \$500 talā i le masina, o le a fa'atinoina i le TF2026/27, lea e mafua ai le si'itaga i lea tausaga ma tausaga i luma atu.

ESESEGA O MEATŌTINO MA NOATAGA

O le eseesega o meatōtino ma noataga a le Mālō o lo'o fuafua e pa'ū, ona toe fa'aleleia lea i tausaga fa'aletupe e tolu o lumana'i. O lenei si'itaga e atagia mai ai, e ui ina si'itia tupe fa'aalu, ae o lo'o mata'itūina lelei tulaga i noataga e pei ona fa'ailoa i le Pusa 4.6 O lenei suiga e mafua mai i le toe fa'atulagaina o le lipotiina o fesoasoani a le Mālō i Fa'alapotopotoga ma Ofisa a le Mālō. E ui i lea fa'aitiitiga, o lo'o fa'atūmauiina pea le naunauta'iga a le Mālō e fuafua tataua vaegātupe ina ia mautinoa le fa'atupula'ia o aseta mo le atiina'e manuia o le atunu'u, ma ia pulea lelei aitalafu a le Mālō e pei ona fa'ailoa atu i le Pusa 4.6 o lo'o i lalo.

Pusa 4.6: Fa'amatalaga o Meatotino ma Noataga (miona talā)

FAAMATALAGA O MEATOTINO MA NOATAGA	2025-26	2026-27	2027-28	2028-29
SUIGA I LE AOFAIGA O MEATOTINO: GAIOIGA	6.2	136.8	113.9	120.6
Gaioiga o Meatotino Umia e le o ni Tinoitupe	132.4	250.4	226.0	227.4
Meatotino Tumau	123.4	245.9	221.5	222.9
Maota ma Fale Tetele	120.4	244.9	220.9	222.3
Masini Tetele ma Masini Faigaluega	2.2	0.4	0.0	0.0
Isi Aseta Tumau	0.8	0.6	0.6	0.6
Meatotino e le Gaosia	9.0	4.5	4.5	4.5
Eleele	9.0	4.5	4.5	4.5
Gaioiga o Meatotino o Tinoitupe	-213.4	-200.7	-199.3	-193.9
Tupe Taamilo ma tupe teu	-210.9	-198.2	-196.8	-191.4
Nonogatupe	-2.5	-2.5	-2.5	-2.5
Totonu o le Atunuu	-81.0	-118.3	-116.9	-84.0
Tupe Taamilo ma tupe teu	-78.5	-115.8	-114.4	-81.5
Nonogatupe	-2.5	-2.5	-2.5	-2.5
Fafo atu o le Atunuu	-132.4	-82.4	-82.4	-109.9
Tupe Taamilo ma tupe teu	-132.4	-82.4	-82.4	-109.9
Gaioiga o Noataga	-87.1	-87.1	-87.1	-87.1
Nonogatupe	-87.1	-87.1	-87.1	-87.1
Totonu o le Atunuu	-9.3	-9.3	-9.3	-9.3
Nonogatupe	-9.3	-9.3	-9.3	-9.3
Fafo atu o le Atunuu	-77.9	-77.9	-77.9	-77.9

Fa'amatalaga: Matagaluega o Tupe

FA'ATULAGAINA O LE TALA O LE TUPE IA ŌGATASI MA LE AUIVI O FA'AMAUMAUGA O TUPE A LE MĀLŌ (GFS)

O fa'amatalaga o lo'o tu'uina atu i le Pusa 4.7 ma le 4.8, o lo'o auina atu ai le fa'atusatusaga o tupe fa'atatauina a le Mālō i le Pusa 4.2 ma Fa'amaumauga o Tupe a le Mālō (GFS). O eseesea i tupe maua e aofia ai fefa'ataua'iga i le vā o Matagaluega a le Mālō e pei ona fa'ailoa atu i le Pusa 4.6. O eseesea i tupe fa'aalu o lo'o fa'ailoa atu i le Pusa 4.2 ma le Pusa 4.7, o fetu'una'iga o aseta tau tupe ma noataga fa'apea tupe fa'aalu i le vā o Matagaluega.

Pusa 4.7: Fa'atulagana o Tupe Maua a le Mālō ia ōgatasi ma le GFS (miliona talā)

	2025-26	2026-27	2027-28	2028-29
Tupe Maua				
Tupe Maua Masani	866.9	879.4	884.2	896.7
Tupe Faameaalofa	163.8	206.8	250.2	230.1
Aofaiga o Tupe Maua ma Tupe Faameaalofa (e tusa ma le Pusa 4.2)	1,030.7	1,086.1	1,134.3	1,126.8
<i>Toese</i>				
Tupe Maua mai e toe Faapaleni i Tupe Faaaluina				
Totogiina e Matagaluega tupe mo le faaaogaina o le Fale o le Malo mo Ofisa	3.2	3.2	3.2	3.2
Totogi o oloa e le o faatulagaina i lalo o ni faiga faapisinisi	0.7	0.7	0.7	0.7
	3.9	3.9	3.9	3.9
Tupe Faaaluina e toe Faapaleni i Tupe Maua				
Tupe toe faaolaina mai Lafoga mo Totogi	10.0	10.0	10.0	10.0
Malo	7.5	7.5	7.5	7.5
VAGST e toe Faafoi ma VAGST e totogiina e Matagaluega a le Malo	65.0	62.6	62.9	62.9
	82.5	80.1	80.4	80.4
Tupe Maua faatulagaina i Gaioga o Meatotino o Tinoitupe				
Tupe Alu Mai Nonogatupe tuuina atu i isi Faalapotopotoga	2.5	2.5	2.5	2.5
AOFAIGA O TUPE MAUA FAAAOGAINA AI LE GFS (e tusa ma le Pusa 4.4)	941.7	999.6	1,047.5	1,039.9

Fa'amatalaga: Matagaluega o Tupe

Pusa 4.8: Fa'atulagana o le Aotelega o Tupe Totogi ia ōgatasi ma le GFS (milionā talā)

	2025-26	2026-27	2027-28	2028-29
TUPE ALU				
Tupe Alu I Polokalame	158.7	158.5	158.5	158.5
Faagaioiga o Matagaluega				
Faagaioiga o Faalapotopotoga ma Isi Vaega	450.5	459.9	438.5	438.5
Galuega e Avea ai ma Sui o le Malo	143.7	140.1	140.1	140.1
Tupe Faaalu le Fuafuaina	327.1	327.0	356.4	336.4
Tupe le Fuafuaina	27.6	27.8	28.1	27.5
AOFAIGA O TUPE ALU (e tusa ai ma le Pusa 4.2)	1107.5	1113.4	1121.6	1101.0
TUPE ALU I ATINA'E				
Aofaiga o Tupe Alu i Atina'e	134.0	171.0	209.5	217.2
Aofaiga Tupe Alu i Atina'e (e tusa ai ma le Pusa 4.2)	134.0	171.0	209.5	217.2
TUPE ALU I LE AOTELEGA	1241.5	1284.3	1331.1	1318.2
<i>Toese</i>				
Tupe Alu e faapaleni i tupe toe maua mai				
Tupe toe faaolaina mai Lafoga mo Totogi	10.0	10.0	10.0	10.0
Tiute e toe Faafoi ma Tiute e Totogi e Matagaluega a le Ma	7.5	7.5	7.5	7.5
Matagaluega a le Malo	65.0	62.6	62.9	62.9
	82.5	80.1	80.4	80.4
Tupe Maua e faapaleni ai Tupe Faaalu				
Tupe totogi e Matagaluega mo le faaaogaina o Fale a le Malo	3.2	3.2	3.2	3.2
Totogi o oloa e le o faatulagaina i lalo o ni faiga faapisinisi	0.7	0.7	0.7	0.7
	3.9	3.9	3.9	3.9
Tinoitupe				
Meatotino Tumau				
Maota ma Fale Tetele	120.4	244.9	220.9	222.3
Masini Tetele ma Masini Faigaluega	2.2	0.4	0.0	0.0
Isi Aseta Tumau	0.8	0.6	0.6	0.6
	123.4	245.9	221.5	222.9
Meatotino e le Gaosia				
Eleele	9.0	4.5	4.5	4.5
	132.4	250.4	226.0	227.4
Tupe Alu faatulagaina I Gaoiga o Meatotino o Tinoitupe ma Noataga				
Aofaiga o Meatotino				
Totonu o le atunuu	9.3	9.3	9.3	9.3
Faava-o-malo	77.9	77.9	77.9	77.9
	87.1	87.1	87.1	87.1
AOFAIGA I FAAMATALAGA O TUPE ALU				
FAATULAGAINA I LE GFS (e tusa ai ma le Pusa 4.5)	935.5	862.7	933.6	919.4


Fa'amatalaga: Matagaluega o Tupe

5. Lu'itau i le Tala o le Tupe a le Mālō

Lu'itau i le Tamāo'āiga

O le fuafuaga o le Tala Fa'atatau o le Tupe e fa'amoemoe lea i su'esu'ega fa'avae o le tamāo'āiga, ma o ni suiga e sala ese mai i nei su'esu'ega fa'avae e ono a'afia ai taunu'uga o le tala o le tupe. O lenei vaega e patino i lu'itau tau tamāo'āiga i le lotoifale fa'apea ni isi tulaga i fafo atu. O nei lu'itau e ono mafua ai ni eseese i numera sa fuafuaina ma taunu'uga e fa'amauiina, e pei o tupe maua ma tupe fa'aalu.

Siata 4.1: Va'aiga Mamao i le Fa'atupula'ia o le Tamāo'āiga ma le 95% o le Alāfua Mautonu



Fa'amatalaga: Matagaluega o Tupe (FRAT and SERF Model)

I le mae'a ai o le 4.2 pasene le si'itaga o le tamāo'āiga sa fa'amauiina i le TF2024/25, ua fuafua e fa'atupula'ia le tamāo'āiga i le 4.5 pasene mo lenei tausaga fa'aletupe (TF2025/26). Mo le TF2026/27, o le va'aiga taula'i e fa'aauau pea le fa'atupula'ia i le 3.7 pasene, ma o lo'o fuafuaina e tusa ma le 3.5 pasene ma le 3.0 pasene le fa'atupula'ia i tausaga fa'aletupe e lua o lumana'i. E ui i lenei tulaga, o lo'o iai pea lu'itau e ono sala ese ai le taunu'uga nai lo'o le tulaga sa fuafuaina e fa'atupula'ia ai le tamāo'āiga i le lumana'i. E lua ituaiga lu'itau e ono tula'i mai, o le tulaga lelei (upside risks) ma tulaga fa'aletonu (downside risks) e pei ona fa'amatalaina i lalo.

Tulaga Lelei

I le itū lelei, e ono fa'atupula'ia le tamāo'āiga e ala i le fa'atinoina lelei o le si'itia o tupe fa'aalu a le Mālō. O le si'itia atili o tupe fa'amomoli ma tupe maua mai tatou oloa e auina atu i fafo e mafai fo'i ona avefa ma sao tāua i le fa'atupula'ia o le tamāo'āiga. E le gata i lea, e tusa ai ma le si'itia o tupe fa'aalu, o le isi vaega tāua e ono ūna'ia ai le si'itia o le tamāo'āiga, o le lelei o le fa'atinoina o atiina'e ma polōketi o lo'o fa'agasolo ma fuafuaina. A fua i le tulaga e ono fetu'una'i ai le fa'atupula'ia o le tamāo'āiga i le lumana'i, e tusa lea ma le 10.0 i le 12.0 pasene.

Tulaga Fa'aletonu

I le itū fa'aletonu, o lo'o iai ni lamatiaga tetele e pei o fete'ena'iga fa'avāomālō i le Sasa'e Tūtotonu ma Ukraine e ono a'afia ai le tamāo'āiga mautū i le lalolagi, o ni a'afi'aga i fefa'ataua'iga ona o alafua fou mo lafoga sa fa'atūina e atunu'u tetele ma si'itia ai le tau o oloa fa'atauina mai fafo. E lē gata i lea, o le telegese o le fa'atinoina o polōketi a le Mālō fa'apea le si'itia o le fuainumera o tagata e aga'i atu i galuega fa'avaitaimi, e ono fa'aitiitia ai le gafatia e le atunu'u ona gaosia oloa ma auunaga i lona tulaga maua masani. E ono tula'i mai a'afiaga Fa'a-le-Tulafono ona o le aveeseina o So'otaga Fa'avāomālō Tau Teugatupe (Correspondent Banking Relationships), ma ono fa'aitiitia ai fefa'ataua'iga fa'avāomālō ma si'itia ai le tau o tupe fa'amomoli mai fafo. E le gata i lea, o le tapunia o le Mālō o Amerika fa'atasi ai ma le eliina o minerale mai le alititai (seabed mining) o Amerika Samoa e ono a'afia ai tupe maua mai atunu'u i fafo, le tulaga i le tamāo'āiga, fa'apea le tulaga tau tupe a le Mālō o Samoa. E tusa ai ma ia tulaga, e ono pa'ū maualalo le tamāo'āiga i le tusa lea ma le 5.0 i le 7.0 pasene i le isi tolu tausaga o lumana'i.

O lo'o fa'aauau pea galuega a le Mālō e mautinoa ai le gafataulimaina o le tamāo'āiga ma mafai ona tali atu i lu'itau e ono a'afia ai, e ala i le fa'amausalīina o fuafuaga mo le tala o le tupe e fua i le va'aiga taula'i o le tamāo'āiga ua tā'ua i luga.


Iloiloga i le Tala o le Tupe a le Mālō: Tulaga i Va'aiga Taula'i

Tupe Maua

O tupe maua a le Mālō e aofia ai lafoga, tupe fa'ameaalofa, ma isi ituaiga tupe maua e matuā ma'ale'ale lona tulaga i le ono a'afia ai i suiga tetele i le tulaga tau tamāo'āiga, lea e mafai ona si'itia ai lafoga e aoina, ma fa'atupula'ia mana'oga mo nonōgātupe. O lo'o fuafuaina e tusa ma le 26.1 pasene o le

tamāo'āiga le aofa'i o tupe maua a le Mālō mo le TF2025/26. O le eseese o le fa'atulagaina o tupe fa'ameaalofa mai fafo ma le tulaga e lipotia ai, o lo'o fa'aailoa i le Siata 4.2. O tulaga lelei i tupe maua e aofia ai le si'itia o le vaega o tagata tafafao maimoa, le vave fa'amatu'u o tupe fa'ameaalofa mai pa'aga, fa'apea ma le si'itia o tupe

Siata 4.2: Va'aiga Mamao i le Fa'atupula'ia o Tupe Maua ma le 95% o le Alāfua Mautonu




Fa'amatalaga: Matagaluega o Tupe (FRAT and SERF Model)

fa'amomoli mai fafo lea e mafai ona si'itia ai le aoina o tupe maua mai lafoga, atoa ai ma tupe e ono maua mai le Polokalame Sitiseni e Taula mai i Tupe Teufa'afaigaluega i Samoa. Ae o tulaga fa'aletonu, e ono tula'i mai i a'afiaga o suiga o le tau, o le tuai ona fa'amatu'u mai o fesoasoani mai fafo, fa'apea fo'i ma le fa'aitiitia o mana'oga mo oloa mai fafo e ono fa'aitiitia ai tupe maua mai lafoga.

Tupe Fa'aalu

Siata 4.3: Va'aiga Mamao i le Fa'atupula'ia o Tupe Fa'aalu ma le 95% o le Alāfua Mautonu



Fa'amatalaga: Matagaluega o Tupe (FRAT and SERF Model)

O taunu'uga i Tupe Fa'aalu, ua fa'atūmauina lona pa'ū i lalo ifo ma tulaga sa fuafuaina, fa'atasi ma le tumau pea i le tulaga maualalo o fefa'ataua'iga o aseta, lea sa a'afia ai le tamāo'āiga i le lē gafatia o tulaga masani i le gaosia o oloa ma auaunaga,

fa'apea le avanoa e fa'atupula'ia ai se tulaga maualuga i tausaga o lumana'i. O lenei tulaga na afua mai ona o lu'itau i totonu o Matagaluega ma Fa'alapotopotoga a le Mālō i le lē fa'atinoina lelei o fuafuaga mo tupe fa'aalu i polokalame mo atiina'e tetele. O le va'aiga taula'i fuafuaina o lo'o fa'ailoa mai ai taumafaiga a le Mālō e fa'alaua'itele tupe fa'aalu.

Lamatiaga i Suiga o le Tau ma Mala Fa'alēnatura

O Samoa e matua'i a'afia lava i lamatiaga fa'alēnatura e pei o afā, mafui'e, sunami, lāmala, ma lōlōga. I le tulaga o ia fa'alavelave fa'afuase'i, e matua'i āfaina ai lava le fa'atupula'ia o le tamāo'āiga ma le gafataulimaina o aitalafu. O le tupu tele ma le malosia o afā i le gataifale e ono fa'aleagaina ai atiina'e ma le soifuaga lautele. E aofia ai foi isi a'afiaga o le tau e pei o le si'isi'i o le suāsami ma le tulaga lamatia o le vevela e ono a'afia tele ai vaega tāua o le tamāo'āiga e pei o Fa'ato'aga ma Faigafaiva, fa'apea ma Tagata Tafafao Maimoa mai Fafo.

Tulaga o Nonōgātupe

Nonōgātupe a le Mālō

O le tapula'a mo le aofa'iga o nonōgātupe a le Mālō o lo'o fa'atūmauina i le 50 pasene o le tamāo'āiga. O le fa'aiuga o le TF2025/2026, o lo'o fuafua e fa'amauina ai le 18.8 pasene le tulaga o nonōgātupe i le tamāo'āiga ma o lo'o fa'atūmauina pea i lalo o le tapula'a. O tausaga fa'aletupe o lumana'i, o lo'o fuafua e tu'uititia atili le pasene e tusa lea ma le 15.1 pasene i le TF2026/27, 14.7 pasene i le TF2027/28, ma le 13.4 pasene i le TF2028/29.

O le aofa'iga o tupe totogi i nonōgātupe mo le TF2025/26 e tusa lea ma le \$89.4 miliona talā, o se fa'aitiitiga mai le \$94.7 miliona talā i le TF2024/25.

Tulaga o Nonōgātupe a Fa'alapotopotoga a le Mālō

O le fa'atinoina o le iloiloga o le su'esu'ega o le soifua malōlōina (health check tool) ma le Iloiloga i le Gafatia o le Toe Totogiina atu o Nonōgātupe (CRA), ua mafai ai e le Mālō ona fa'amalosia atili le mata'itūina o tulaga tau tupe a Fa'alapotopotoga a le Mālō. O ia iloiloga e fa'afaigofie ai i le Mālō ona mata'itū tulaga o nonōgātupe e mo'omia ai ona tu'uina atu se fa'amalumaluga a le Mālō. O lo'o mata'itūina foi le fa'aaogāina o faiga fa'avae o tupe toe nonō atu.

O le aofa'iga o le fua fa'atatau o le iloiloga o le soifua malōlōina mo Fa'alapotopotoga a le Mālō² o lo'o fa'ailoa mai ai o le tele o fa'alapotopotoga o lo'o maualalo le tulaga lamatia, aemaise lava i le tulaga o le mafai ona totogi aitalafu. Ae peita'i, o lo'o maualuga le lamatia o le Fa'alapotopotoga o Mālosi'aga tau Eletise, i le tulaga tau tupe maua, ona o le 20 pasene lea na fa'aitiitia ai le tau o le eletise fa'apea le si'itia o le tau o le suāu'u, ua maualuga ai aitalafu. E lē gata i lea, o le tulaga lamatia o le Pulega o Malae Va'alele i lona aotelega, o lo'o fa'aalia ai le maualuga o ana aitalafu ona o lu'itau i tupe maua. O tulaga tau tupe a le Fa'alapotopotoga o Mālosi'aga tau Eletise ma le Pulega o Malae Va'alele, e mana'omia ai pulega lelei e fō'ia ai atugaluga tau tupe ma si'itia ai tupe maua.

O Isi Lamatiaga ua Alia'e Mai

O fa'alavelave i auaunaga mo le lautele aemaise lava i mālosi'aga, o le lē mautonu o faiga fa'aupufai, ma tulaga o a'afia o le soifua malōlōina, e ono fai ma lu'itau i le si'itia o le tamāo'āiga o Samoa i le lumana'i. O le fa'alavelave o le tau fa'asoasoina o le eletise na a'afia ai ni isi o ālāmanuia 'autū e pei o vaega i Fefa'ataua'iga, Fa'ato'aga, Faletalimalō ma Fale'aiga, ma Oloa Gaosi ona ua si'itia ai tau mo le fa'atinoina o galuega ma auaunaga. O le fa'atinoina o galuega ua ave iai le fa'amuumua a le Mālō ua tōfia, e ono a'afia ai fa'atulagana o galuega, auaunaga lautele, ma le maua pea o

² Su'esu'ega o le Soifua Malōlōina o Fa'alapotopotoga a le Mālō, Iuni 2023. O le lipoti o le 2024 o le a fa'amae'aina ma fa'amaonia i le fa'ai'uga o le 2025

tupe teufa'afaigaluega. O a'afiaga tau soifua mālōlōina e aofia ai le misela, KOVITI-19, fiva o ponaivi, ma isi fa'ama'i pipisi i le lumana'i, e ono lē gafatia e auaunaga fa'alesoifua mālōlōina, fa'aitiitia ai le auai o tagata faigaluega i galuega, ma si'itia ai tupe fa'aalu i mana'oga o tagata lautele. O ni a'afiaga i le tulaga ta'uleleia o le atunu'u e ono tula'i mai i le fa'atinoina o le Polokalame Sitiseni e Tauala mai i Tupe Teufa'afaigaluega i Samoa, e ono āfāina ai faiga pa'aga masani ma ā tatou pa'aga mo atiina'e. I lona tu'ufa'atasiga, o vaega nei e ono telegese ai le fa'alauteleina o le tamāo'aiga, si'itia ai tupe fa'aalu nai lo'o tupe maua, ma a'afia ai taumafaiga mo atiina'e gafataulimaina a Samoa.

6. Polokalame tau Atiina’e a le Mālō

O le Polokalame tau Atiina’e a le Mālō o lo’o fa’ailoa mai ai atiina’e tetele a le Malō o lo’o fa’atinoina i vaega ma’oti eseese. O lenei Polokalame e mafai ai ona sili atu le malamalama’aga i fuafuaga ma polokalame mo atiina’e uma a le Malō, ia mautinoa ai o lo’o lelei lona fuafuaina, mata’itūina ma le fa’atinoina. E le gata

i lea, o lo’o tu’uina atu i le Polokalame tau Atiina’e a le Mālō se fa’ava’a fa’ata’atia mo le fa’asoaina lelei ma le tufatufaina atu o alaga’oa i vaega ma’oti uma.

E lua vaega o lo’o vaevaeina ai le Polokalame Tau Atiina’e a le Mālō: atiina’e o lo’o fa’atinoina ma atiina’e o lo’o fuafuaina (e aofia ai poloketi sa fa’amaonia e le Komiti a le Kapeneta mo Atiina’e).

Atiina’e Fa’aauau ma Atiina’e Fuafuaina a le Mālō

O ni isi o atiina’e tetele a le Mālō ua iai vaegatupe mai Pa’aga mo Atiina’e mo le fa’atinoina, o lo’o fuafua e amatalia le fa’atinoina i le TF2025/26 ma le TF2026/27. E aofia ai le Falema’i i Salelologa Savaii, o ni isi o polokalame atiina’e mo le Vaega Maoti o Mālosi’aga, ma Polokalame i le Vaega Maoti o le Si’osi’omaga e lagolagoina ai taunu’uga mo le puipuia ma le fa’amausaliina o le si’osi’omaga. O lo’o aofia ai fo’i le Poloketi mo le Tali atu i Suiga o le Tau ma Fela’ua’iga i le Laueleele, le Polokalame mo le Fa’amalosia o le Mata’itūina o Tulaga Tau Tupe a le Vaega Maoti o Tupe, ma le Poloketi mo le Fa’afaigofieina o le Taulimaina o Fesoasoani Tau Tupe mo Pisinisi.

O lo’o iai foi ni isi o atiina’e fuafuaina ua fa’amaonia e le Komiti a le Kapeneta mo Atiina’e, e aofia ai le Ofisa Tūtotonu a le Pulega o Suāvai i Vaitele, le Fale Fa’i Nifo fou, le suiga o le Va’a Su’esu’e mo le Gataifale, fa’apea ma le Fale Fuimū fou mo Salelologa.

O atiina’e tetele o lo’o fa’aauau le fa’atinoina atoa ai ma atiina’e o lo’o fuafuaina, o lo’o auiliili atu i le Pusa 6.1.

Pusa 6.1: Aotelega o Poloketi Autū mai Vaega Maoti Ta'itasi

Atiina'e Tetele o lo'o Fa'aauauina	Atiina'e Tetele o lo'o Fuafuaina
Fa'ato'aga ma Faigafaiva	
Poloketi Fesoasoani mo le Au Faifa'ato'aga, Au Faifaiva ma le Maketiina mo Fefa'ataua'iga Polokalame mo le Atiina'e o le Tamāo'aiga ma le Soifua Lautele – Meafaigaluega Fou mo le SROS Poloketi o le Fausia o le Fale e Teu ai Masini Tetele mo Fa'atoaga Fesoasoani Maua Mai le Feagaiga Fa'avaomālō a Samoa ma Amerika mo Poloketi Atiina'e – Fa'afouina o Masini Fai'aisa ma Pole (FADs) mo le Matagaluega o Fa'ato'aga ma Faigafaiva	Va'a Su'esu'e Fou mo Faigafaiva
Tulaga Tau Tupe	
Poloketi mo le Atiina'eina o le Vaega Maoti o Tupe Poloketi mo le Fa'amalosia o Feso'ota'iga i Tulaga Fa'afaletupe i le Pasefika Galuega mo le Fausiaina o le Fale Fou a le Faletupe Tūtotonu o Samoa (Ululoloa)	Polokalame mo le Fa'amalosia o le Mata'itūina o Tulaga Tau Tupe a le Vaega Maoti o Tupe
A'oa'oga	
Fausiaina o le Faleaoga Fa'asaienisi a le Iunivesite Aoao o Samoa Fausiaina o Faleaoga o Lepea, Apia Primary School ma St Theresa Fausiaina o le Faleaoga mo SENESE Poloketi mo Feso'ota'iga mo A'oga	Faigapa'aga Fa'avāomālō mo A'oa'oga (GPE)
Soifua Mālōlōina	
Fesoasoani mo Tui Puipui Fou i Totonu o le Pasefika	Fausiaina o le Fale Fa'i Nifo fou Falema'i i Savaii– fa'aleleia o auaunaga tau soifua mālōlōina

Polokalame mo le Fa'amalosia o Auaunaga Fa'alesoifua Mālōlōlina mo Taunu'uga Manino Polokalame Fesoasoani mo Masini mo Togafitiga a le Falema'i Fausiaina o le Nofoaga Tūtotonu mo A'oa'oga Tausi Soifua	Fuafuaga ma Feso'ota'iga mo le Puipuiga ma le Tali atu i Faama'i Pipisi (Fale Su'esu'e)
Tūlāfono ma Fa'amasinoga	
Fausiaina o le Fale fou o le Fono Faitūlāfono Fausiaina o le Fale Fa'amasino i Savaai Fausiaina o le Falepuipui i Vaiaata	Fausiaina o le Fale Fuimū i Salelologa
Fela'ua'iga, Atiina'e ma Galuega Tetele	
Poloketi Fesoasoani mo Auala e Tali atu ai i Suiga o le Tau (SCRTP) Poloketi mo le Fa'aleleia o le Uafu a Samoa Poloketi Fa'aleleia o le Auala Kolosi Tūtotonu a Upolu Fesoasoani mo Atiina'e Itūlagi o Va'alele Sivili ma Auala Tetele Fausiaina o le Maketi i Savalalo Poloketi mo le Fausiaina o le Fa'atānoa i Alaoa Va'a La'upasese i le Vā o Motu Va'a fou o le Fotu-o-Samoa III Fausiaina o Auala Gālua	Poloketi mo le Tali atu i Suiga o le Tau ma Fela'ua'iga i le Laueleele Poloketi mo le Fausiaina o le Fa'atānoa i Alaoa – Vaega 2
Mālosi'aga	
Poloketi mo Mōli o le Taulaga o Apia e fa'aogaina ai mālosi'aga e maua mai i le Lā Fesoasoani mo le toe Fa'aleleia ma le Fa'atōtōgaina o Afi Eletise i Ta'alefaga ma Fiaga	Polokalame mo le Fa'aleleia o le Vaega Maoti o Mālosi'aga (GridSECURE)

Poloketi mo Mālosi'aga Fa'afouina mo Tagata Lautele (Off-grid)	
Ta'iala mo le Tali Atu i Suiga o le Tau i Vaega tau Femālagā'iga a Atunu'u Lāiti (CAP-IT)	
Fa'amatalaga ma Feso'ota'iga Fa'atekonolosi	
Poloketi mo le Malu Puipua o Feso'ota'iga Fa'atekonolosi	
Suāvai & Vai Lafoa'i	
Polokalame mo le Atiina'e Tamāo'āiga ma le Soifua Lautele - Loli pamu vai.	Ofisa Tūtotonu a le Pulega o Suāvai Poloketi mo le Tali atu i Suiga o le Tau mo Auaunaga tau Suāvai & Vai Lafoa'i
Si'osi'omaga	
Polokalame mo le Atiina'e o le Tamāo'āiga ma le Soifua Lautele TF2023 - 2 loli tineimū e fa'aogaina ai vailaau fa'apitoa. Vaega Lua o le Poloketi mo le Saogalemū ma le Gafatia ona Tali Atu i Suiga o le Tau (BSRP)	Polokalame a le Pasefika mo le Si'itia o Tapenapenaga e Tali atu ai i Suiga o le Tau ma Fa'alavelave Fa'afuasei Poloketi e Tali atu ai i Suiga o le Tau i vaega i le Gataifale a le Polokalame Tau Atiina'e a Mālō Aufa'atasi (UNDP) – GEF 8. Poloketi mo le Mata'itūina o Nofoga Apovai i Vaisigano Polokalame mo le Atiina'e o le Tamāo'āiga ma le Soifua Lautele TF2025 - Meafaigaluega a le Ofisa Va'ai Tau Polokalame mo le Fausiaina o le Fale Teu Oloa mo Fesoasoani mo Fa'alavelave Fa'afuase'i
Fefa'atauaiga, Pisinisi & Oloa Gaosi	
	Poloketi mo le Fa'afaigofieina o le Taulimaina o Fesoasoani Tau Tupe mo Pisinisi (SAFER)
Nu'u ma Afioaga	
Polokalame a le Mālō mo Atiina'e a Itumālō	Polokalame mo le Fa'atāuaina o Itupā Uma i Atiina'e a Nu'u ma Afio'aga

Fa'amatalaga: Matagaluega o Tupe

**Lōmiga a le
Matagaluega o Tupe
Apia, Samoa**